

黔黔

書(一)志







黔 志

王士性著

黔志

明 天台王士性恆叔著

貴州古羅施鬼國。自蜀漢彝酋有火濟者。從諸葛武侯征孟獲有功。封羅甸國王。歷唐宋皆不失爵土。洪武初元。宣慰使靄翠與其同知宋欽歸附。高皇帝仍官之。爲貴川宣慰使司。隸四川。其思州宣慰使爲田仁智。思南宣慰使爲田茂。安暨鎮等府隸湖廣。普安鎮甯等州隸雲南。靄翠死。妻奢香代立。宋欽死。妻劉氏代立。劉氏多智術。時馬睥以都督鎮守其地。欲盡滅諸羅酋。代以滇官。乃以事裸撻奢香。欲激怒諸羅彝爲兵端。諸彝果怒欲反。劉氏止之。爲走愬京師。上令招奢香至。問曰。汝誠苦馬都督。我爲汝除之。何以報我。奢香曰。世戢羅彝。不敢爲亂。上曰。此汝常職。何云報也。奢香曰。貴州東北有閒道。可通四川。願刊山通道。給驛使往來。上許之。謂高后曰。吾知馬都督無他腸。然何惜一人以安一方。乃召馬斬之。遣奢香歸。諸彝大感。爲除赤水烏撒道。立龍場九驛達蜀。今安氏卽靄翠後。

貴州設山上。中高而外低。如關索。乃貴鎮山。四水傾流。內無停蓄。北二水一出涪江。一出瀘江。東一水出沅江。南二水一出左江。一出右江。有水源而無水口。故是行龍之地。非結作之場也。

貴州多洞壑。水皆穿山而過。則山之空洞可知。如清平十里雲溪洞。水從平越會百里來。又從地道潛復流雲洞盡處。水聲湯湯如溪流。洞右偏土人又累石爲堤。引支水出洞南。灌田甚廣。新添母珠洞發衛

六七里。陟降高崖。卽見流水。入山椒穿洞過。出水處亦一洞。乃名母珠。嘗有樵者至洞中。數石子隨一大石。似子逐母。夜有珠光。故名也。最奇者。普安碧雲洞。爲一州之壑。州之水無涓滴不趨洞中者。乃洞底有地道。隔山而出。洞中有仙人。曰高下可數十畦。石墜迴曲。界限儼如人閒。豈神仙所嘗種玉禾者耶。其無水而曠如者。偏橋飛雲洞。由月潭寺左拾級而登。仰視層巖。如蜂房燕窠。級窮上小平臺。石欄圍繞。臺後崑嵌入巉絕巖上。如居人重簷覆出。而石乳懸竇。怪詭萬狀。洞前立二石。突兀更奇。他如鎮遠凌園洞。清平天然洞。安莊雙明洞。與平霸喜客泉。安莊白水。或道左而未過。或輿過之而未窮。其勝不能一一紀之。

出沅州而西。見州卽貴竹地。顧清浪鎮遠。偏橋諸衛。舊轄湖省。故犬牙制之。其地止借一線之路。入滇兩岸皆苗。晃州至平夷十八站。每站雖云五六十里。實百里而遙。士夫商旅。縱有急止。可一日一站。破站則無宿地矣。其站皆以軍夫。辰州以西。輻無大小。官無貴賤。輿者皆以八人。其地步步行山中。又多蛇霧雨十二時。天地闇忽。閒三五日中。一晴霽耳。然方晴。倏雨。又不可期。故土人每出。必披氈衫。背竊笠。手執竹枝。竹以驅蛇。笠以備雨也。諺云。天無三日晴。地無三里平。其開設初。只有衛所。後雖漸改流。置立郡邑。皆建於衛所之中。衛所爲主。郡邑爲客。縉紳拜表祝聖。皆在衛所。衛所治軍。郡邑治民。軍卽尺籍。來役戍者也。故衛所所治。皆中國人民。卽苗也。土無他民。止苗彝。然非一種。亦各異俗。曰宋家。曰蔡家。曰仲家。曰龍家。曰曾行龍家。曰羅羅。曰打牙矜。曰紅矜。曰花矜。曰東苗。曰西苗。曰紫蓋苗。

總之槃瓠子孫。椎髻短衣。不冠不履。刀耕火種。樵獵爲生。殺鬪爲業。郡邑中但征賦稅。不訟鬪爭。所治之民。卽此而已矣。

本朝勾取軍伍。總屬虛文。不問新舊。徒爲民累。惟貴竹衛所之軍。與四川雲南皆役之。爲驛站。與夫糧不虛糜。而歲省驛傳。動以萬計。反得其用。

彝人法嚴。遇爲盜者。縋其手足於高桅之上。亂箭射而殺之。彝俗射極巧。未射其心膂。不能頃刻死也。彝性不畏亟死。惟畏緩死。故不敢犯盜。貴州南路行於綠林之輩。防禦最難。惟西路行者。奢香八驛。夫馬廚傳。皆其自備。巡邏干掇。皆其自轄。雖夜行不慮盜也。彝俗固亦有美處。

貴州土產。則水銀。辰砂。雄黃。人工所成。則緝皮爲器。飾以丹朱。大者箱櫃。小者筐匣。足令蘇杭卻步。雄黃一顆。重十餘兩者。佩之宜男。土官中有爲盤爲屏。以鎮宅舍者。砂生有底。如白玉臺。名砂牀。箭頭爲上。牆壁次之。雖曰辰砂。實生貴竹。

關索嶺。貴州極高峻之山。上設重關。掛索以引行人。故名關索。俗人訛以爲神名。祀之。旁有查城驛。名頂站。深山邃箐。盜賊之輩。實繁有徒。縉紳商賈。過者往往於此失事。崑以一衛尉統邏卒護之。

安宣慰。唐時人家渠。謂歷代以來皆止羈縻。卽拒命。難以中國臣子叛逆共論。故時作不靖。弗安禮法。其先宣慰不逞。陽明居龍場時。向貽書責之。其後安國亨格詔旨。朝廷遣使就訊之。令其因服對簿。赦弗征。而國亨後亦竟桀驁如故。院司弗能堪。今安疆臣襲又復悖戾。不遵朝廷三尺。如貴竹長官司改縣。

已多年而疆臣猶欲取回爲土司。天下豈有復改流爲土者。故江長信疏欲勦之。未知廷議究竟何似。養龍坑長官司有坑在兩山之閒。停蓄淵深。似有蛟龍在其下。當春時騰駒游牝。彝人插柳於坑畔。取牝馬繫之。已而雲霧晦暝。類有物蜿蜒與馬接者。其生必龍駒。

鎮遠滇貨所出。水陸之會。滇產如銅錫。斤止值錢三十文。外省乃二三倍其值者。由滇雲至鎮遠。共二十餘站。皆肩挑與馬羸之負也。鎮遠則從舟下沅江。其至武陵又二十站。中間沅州以上。辰州以下。與陸路相出入。惟自沅至辰。陸止二站。水乃經盈口竹站。黔陽。洪江。安江。同灣。江口共七站。故士大夫舟行者多自辰溪起。若商賈貨重。又不能捨舟。而溪灘亂石險阻。常畏觸壞。起鎮遠至武陵。下水半月。上水非一月不至。

思石之閒。水則烏江發源。播之南境。下合涪江。陸與水相出入。此川貴商賈貿易之咽喉也。卽古牂牁夜郎地。思南府西有古牂牁都城。漢末所築者。古牂牁郡領扶歡。夜郎等縣。或云夜郎在珍州。珍屬播。與今思明接界。

播州東通思南。西接瀘北。走綦江。南距貴竹。萬山一水。抱遶縈迴。天生巢穴。七日而達內地。然其地坐貴竹。而官繫川中。故楊酋應龍伺川中。上司則恭。見貴竹則倨。川議賞貴議勦。非一日矣。及王中丞繼光倉卒舉事。挫辱官兵。於是天討難留。而又加以七姓五司。素被傷殘。赴闕請勦。然彼酋畏懼。天兵之至。情願囚首抹腰。聽勘處分。蓋彼酋因子死巴獄。而又防七姓之侵陵。故死不敢入重慶。而不憚囚服了。

事者其情也。何敢輒萌他變。而此中以曾拒王師。故心疑之。而不敢前。余弟圭叔守重慶。規知顛末。單車入往諭之。彼遂出松坎來迎。松坎者。此入三日。而彼出五日程也。其後乃於安穩塔。蓋衙門聽司道。贊畫入勘贖。緩而罷。是行也。實賢於數萬師矣。



黔 書

(一)

田 雯 編

本館據粵雅堂叢
書本排印初編各
叢書僅有此本

序

嘗考讀古今輿圖疆理之書。所載山川之隆窪。財賦之豐嗇。與夫士馬甲兵人材風俗之備詳。誠有資於治術矣。而文采則不足。及觀歷代詞人才子賦名都。言井里。擷蟲魚草木之華。多宮闕城郭之盛。極其偉麗矣。至於攬景物之蕭條。感變聲之衰颯。亦復淒涼悲慨。嚼徵含商。然以語於治之得失。民之休戚。則概未之及也。蓋著述之不能相兼如此。今讀中丞蒙齋先生黔書。則不然。先生之書。蓋專爲治黔者法也。黔地居五溪之外。於四海之內。爲荒服。其稱藩翰者。未三百年。其地尺寸皆山。欲求所謂平原曠塹者。積數十里而不得。袤丈其人。自軍屯衛所官戶戍卒。來自他方者。雖曰黔人。而皆能道其故鄉。無不自稱爲寓客。其眞黔產者。則皆苗獠狔狍之種。劫掠仇殺。獷悍難馴。易於負固。其土田物產。較他方之瘠薄者。尙不能及十之二。夫以黔之地之人。之不可倚以守也。如彼。其土田物產之無可利賴也如此。夫國家亦何事於黔哉。吾聞先生之言曰。無黔則粵蜀之臂可把。而滇楚之吭可扼。國家數十年來。亦知荒落之壤。無可供天府之藏。猶且日仰濟於他省。歲糜金錢而不惜者。救甯之道。固如是也。然則黔治則有與之俱治者。黔亂則有與之俱亂者。先生以英偉之才。深沈之識。身處其地。知之審。慮之周矣。故其爲書。於所以致治而防亂者。三致意焉。道里之險易。必詳之。所以謹慎伺嚴往來也。山谷之紆曲者。徑遂者。必分別誌之。所以慎封守。飭固圉也。夫治蠻徼者。審其地利。察其人情。始焉必無以啓之。而繼焉必有以制之。慎稽其出

入之門戶。熟悉其黨與之離合。防其阨塞。絕其句連。禁其剽掠。審其器械材力之長短利鈍而善禦之。所謂有以制之者也。使之雖安於其習俗。相樂於其燕閒。羣苗勿驚於擾索。土司勿困於誅求。所謂無以啓之者也。故先生之書。既重於嚴兵守土。而尤重於羈縻撫綏。每於前人定亂服叛之舉。其不事張皇。不煩兵革者。必津津書之。以爲前事之不忘。後事之師。此先生所以治黔而即可永爲治黔之法者也。雖然。先生之爲是書。又不獨以經濟自負也。蓋其英偉之才。深沈之識。具雄奇而擅奧博者。又實爲詞人學士之宗。凡黔之草木山川人材土物。皆幸有先生以發其菁英。而抒其藻麗。是故椎蠹刻木。皆可入王會之圖也。踏月吹笙。皆可作名郡之賦也。飛雲白水之瀑。可以媲美於台廬也。濟火關索之名。可以核實於紀載也。牡丹之花。並於洛陽。渥洼之產。雄於冀北。以及丹砂。卉革。砮礮。雄黃之屬。皆豔稱而悉數之。使人之視黔。以爲名邦。以爲樂土。慕而安之。美而賦之。蓋不欲使天末一隅。爲曹鄴之無譏于季札。且將如吳蜀之見賦於左思。先生之於黔。不亦思深而意長乎。後之讀是書者。既賴以治黔。而又資其餘材。以考據史傳。乞靈詞賦。則是書也。豈獨與爾雅方言。與夫稽合之狀。鄺元之注。同日而語哉。至於龍場之祠記。尊昔先民。而不以異同相詆訾。則尤崇獎激厲之盛心矣。嘉炎來黔。受其書而讀之。不禁快然曰。是書也。經濟文章。任人之攜取。而各得所謂仁者見之謂之仁。智者見之謂之智者也。蓋著述之兼美者。莫踰於此矣。因樂爲之序。以附不朽云。

康熙庚午九月浙西徐嘉炎華隱序

蒙齋說

德州田綸霞先生。由撫吳徙鎮黔中。自號曰蒙齋。而屬余爲之說。余考易之蒙卦。上艮下坎。坎之陽爻爲九二。其辭曰。包蒙吉。艮之陽爻爲上九。其辭曰。擊蒙利禦寇。蓋九二以一陽爲內卦之主。統治羣陰。繫之以包。有含容之義。含容者。非徒事於禴。將以教思爲涵育者也。上九以剛居上。治蒙過剛。繫之以擊。有奮迅之意。奮迅者。非徒事於斷。將以時行爲變革者也。使徒事於禴。則弛而不嚴。而剛柔不可以相接。徒事於斷。則慘而不舒。而上下不能以皆順。夫子之象。皆治蒙之効也。然治蒙之道。以教育爲本。不得已而時至事起。則變以革之。故有內外之分焉。而序卦亦云。蒙者。蒙也。物之穉也。物穉不可不養也。然則包之者。居先擊之者。居後。義固有不可易者。先生自吳來黔。黔之民盡蒙之甚者也。芻愚闇塞。而弗率厥迪者。有之。桀驚而不可馴者。有之。先生曰。吾以身處乎蒙之中。而與之相習。然後可以無所拒。無所不容。以爲之包。而可無所事於擊。蓋擊蒙者。任才而包蒙者。必先任德。上之過剛。誠不若二之剛中也。而蒙之義全矣。故先生之治黔。率養之以寬。而人皆革面。舉而措之天下。亦猶黔也。然則先生殆精於蒙卦之義。而乃以蒙自命者耶。若夫以養正爲聖功者。註疏云。懷德於隱。使人莫能測其淺深。先生則誠有之。而豈余之所能淺窺乎。或曰。童蒙求我。初筮告。先生於此。殆又有虛懷好問之義焉。是說也。亦當質之於先生。浙西嘉炎又題。

黔書

卷一目錄

册建

改隸

設科建學疏附

定黔

苗蠻種類部落

苗俗

黔風

土官

方言

治苗

平亂

卷二目錄

積穀米價附

鹽價

禳火

救火

山水

泮河江

紫池

關索嶺

葛鏡橋

鐵鎖橋

大相見坡小相見坡

白雲山

扁趵泉賦附

白水巖

柳阮

象冢

涵碧潭

飛雲巖

雙井

碧雲洞

東山

甲秀樓

卷三目錄

人物名宦

孫文恭郭青螺記附

竹王

濟火

武鄉侯祠

神武祠碑壯繆辨附

奢香

詹廣文

許長史

陽明書院

淮陰侯後

張三丰

月溪

南霽雲康保裔

黑神廟

夏國公祠

碑

水西馬烏蒙馬

卷四目錄

革器

朱砂賦附

砵礪

雄黃

蒟醬

邛竹

石花

脆蛇

蜜筩柑

藥弩

蘆笙

蕨草

凱里鉛

羊桃藤

雞縱

刺梨

蓮

紅梅丹桂

五九菊

魚

武侯錦

鹿

虎

紙

石

砂牀

斷腸草斷腸烏

牡丹

紫薇

蠱毒

瘴癘

旱

土飯

竹米

芝妖

螞蟥

人通馬語馬通人語

黔士制義

黔書卷一

濟南 田雯蒙齋 編

叛建

貴州之得名。始於元。前此則梁州。鬼方。靡莫。黔中。牂牁。羅甸。羅施。緇靡州也。至元十六年。諸蠻降。置八番。羅甸等處軍民宣慰使。及都元帥府於貴州。是以有貴州之名也。厥後相沿而勿改。明洪武中。設貴州。思州。思南三宣慰。而別設都指揮使司於貴州。領貴州衛。貴州前衛。龍里。新添。清平。興隆。都勻。威清。平壩。普定。安莊。安南。普安。赤水。畢節。永寧。烏撒。十八衛。安南。安籠。平彝。樂民。摩泥。普市。白撒。阿落密。黃平。九千戶所。永樂十一年。廢思南。思州宣慰司。始設貴州等處承宣布政使司。以蔣廷瓚爲布政使。領思南。思州。銅仁。石阡。鎮遠。黎平。烏羅。新化。八府。十八年。始設貴州等處提刑按察使司。正統四年。始命右副都御史丁璿巡撫貴州。成化三年。始以程信爲兵部尙書。總督川湖雲貴。十年。設程番府於程番長官司。宏治六年。設都勻府。隆慶二年。改程番府爲貴陽府。移治省城。萬歷二十年。以安順州爲安順軍民府。二十八年。滅播。以播地設平越府。崇禎三年。以水西地設開州一州。敷勇。鎮西二衛。於襄。脩文。赫聲。濯靈。定南。威武。息烽。柔遠。八所。我朝順治十八年。平馬。乃營。設普安縣。康熙三年。平水西。設平遠。大定。黔西。威寧。四府。論曰。貴州古荒服地也。東臨荆楚。西接蜀粵。南倚滇雲。亦西南之奧區也。雖華陽黑水。列在方州。而毒谿。

瘴嶺蔽日尋雲。一綫羊腸。裊空切漢。行路之難。難於上青天。加以衣羽穴居。鳥言椎鬻之倫。星羅而碁布。刻藥矢響。大黃日尋。於攻剽格鬪。故雖以虞帝之聖。殷宗之賢。必七旬而後格。三年而後克。不甚難乎。莊躡之路地。有同假道。唐蒙之持節。幾屬斲空。卽或壁幣來王。要亦羈縻勿絕而已。至明漸入版章。側肩內地。分符竹。建帥闢。哀然稱藩焉。然其閒賓叛不一。荒忽靡常。亦百戰而後有之。有之誠非易矣。奈之何。明臣何文淵。葉臺山。乃欲效公孫宏。賈捐之之議也。夫無黔則粵蜀之臂可把。而滇楚之吭得扼矣。召公爲政。日闢國百里。豈未之前聞乎。今者海隅又安。南人向化。亦知荒落之壤。無翠羽。蠙珠。文犀。拱壁。可供天府之藏。然猶且日仰濟於他省。歲糜金錢而不惜者。聖天子救寧之道如是耳。

附錄蜀杜光庭錄異記云。李特字彜休。廩君之後。昔武落鍾離山崩。有石穴二所。一赤如丹。一黑如漆。有人出於赤穴者。名務相。姓巴氏。有出於黑穴者。凡四姓。皞氏。樊氏。柏氏。鄭氏。五姓皆出。爭爲長。於是務相約以劍刺穴。能著者爲廩君。四姓莫著。而務相之劍懸焉。又以土爲船。雕畫之。而浮水中。曰。若其船浮者爲廩君。務相船又獨浮。于是遂稱廩君。乘其土船。將其徒卒。當穹水而下。至於鹽易。鹽易水神女子止廩君。曰。此魚鹽所有地。又廣大。與君俱生。可止無行。廩君曰。我當爲君求廩地。不能止也。鹽神夜從廩君宿。旦輒去。爲飛蟲。諸神皆從。其飛蔽日。廩君欲殺之。不可別。又不知天地東西。如此者十日。廩君卽以青縷遺鹽神。曰。嬰此卽宜之。與汝俱生。不宜將去汝。鹽神受而嬰之。廩君至碭石。上望膺有青縷者。跪而射之。中鹽神。鹽神死。羣神與俱飛者皆去。廩君復乘土船下。及巨城。巨城石岸曲。泉水亦

曲望之如穴狀。廩君歎曰：我新從穴中出，今又入此，奈何？岸卽爲崩，廣三尺餘。階階相承，廩君登之，岸上有平石，長五尺，方一丈。廩君休其上，投策計算，皆著石焉。因立城其旁而居之。其後種類遂繁，秦并天下，以爲黔中郡。

改隸

貴州古梁州南境，戰國隸於楚，旣隸於秦，漢分隸牂牁、犍爲、武陵三郡。荆益二州，唐隸黔中，荆南二道，采訪使，晉天福五年，附於楚。宋至道三年，分隸荆湖、劍南、東西路。元豐改隸湖北，夔州二路。元分隸湖廣、四川、雲南、廣西四行省。明洪武初，分隸雲南、湖廣、四川三布政司。後設都司於貴州，領十八衛。九所。永樂十一年，改貴州宣慰司隸貴州布政司。宣德中，省烏羅、新化二府入黎平、銅仁府。萬歷二十八年，改湖廣、平溪、清浪、偏橋、鎮遠四衛隸貴州。黎平府隸湖廣。三十一年，復以四衛隸湖廣。黎平府仍隸貴州。我朝康熙十一年，改龍里、平越、都勻、普定四衛爲縣。省安莊衛入鎮寧州。清平衛入清平縣。黃平所入黃平州、新城所入普安縣。二十二年，改黔西、平遠二府爲州。省新興所入普安縣，移縣治於所地。仍改偏橋、鎮遠二衛隸貴州。卽省鎮遠衛入鎮遠縣。二十六年，裁都司，改貴州衛。貴州前衛爲貴筑縣，設縣治於省城。改鎮西、威清二衛爲清鎮縣，設縣治於威清地。省赫聲、威武二所附之。改平壩衛爲安平縣。省柔遠所附之。改安南衛爲安南縣。敷勇衛爲脩文縣。省脩文、濯靈於襄。息烽四所附之。改永寧衛爲永寧縣。省普市所附之。改畢節、赤水二衛爲畢節縣，設縣治於畢節地。省興隆衛入黃平州。新添衛入貴定縣。各移州縣治於衛。

地。又省烏撒衛入威寧府。普安衛入普安州。偏橋衛入施秉縣。定南所入普定縣。安籠所入南籠廳。改大定府爲州。

論曰。地之分合。因乎時制。之便否。酌其宜。犬牙之說。柱蓋未可膠也。黔之幅員。亦甚褊矣。在昔截楚。移播而後成。有如水田之衣。雖則成衣。然捉襟則肘露。而短方至。鼯也。稽戶口。考租庸。不足從邾莒之後。而又錯之蠻髦之鄉。加之兵燹膏災之餘。民不餘什一焉。賦不敵東南小郡焉。說者謂宜割楚之辰沅。蜀之遵義。粵之泗城。以益之。然而職方既定。有所不必紛更也。若夫改衛爲縣。軍則久已爲民。裁屯弁而歸之。有司事權遂一。積弊可清。國家之立制。誠至當矣。

設科附請建學疏

貴州設科。前此未有也。明洪熙元年。始令貴州生儒就試湖廣。宣德元年。詔雲貴合試。至嘉靖十四年。乃從巡按王杏給事中田秋之請。開科於貴州。宣德二年。定會試南北中卷數。以雲貴入中卷。我朝因之。如舊。

論曰。科目設自隋唐。而貴州不與。時無劉蛻。天荒未易破也。逮洪宣之季。而合試始詔。迄王田之請。而鄉闈以分。因額數之定。而中卷以入。何其遲之又久哉。然方其未分也。解額不過二十一人。其獲登進士榜者。科或二人。或三四人。未嘗無一第也。及其既分。解額二十五人。漸增至四十人。南宮之薦。踵相接焉。蓋自王文成。鄒爾瞻。講學明道。人知向學。故黔之士能望的而趨。握瑾以售。正不乏人也。我國家定黔以來。

興賢造士。設科者七。闢門之典。眎昔加盛矣。夫輪困離奇。可爲萬乘之器。膜腴肺腊。尙供滋膳之需。旣列賢書。豈艱上第。此雖鼓舞人才者之責也。然而黔之士曷亦勉乎哉。

附請建學疏。題爲聖德普洽寰區。敬請脩舉學制。以隆文教事。竊惟全黔邊徼遐陬。民苗雜居。向者禮讓未興。剽悍成習。我皇上道隆德盛。典學崇儒。文明光被。而芹藻之子。均沾教化。秀頑之民。咸沐恩澤。固已彬彬乎稱盛矣。臣忝任撫黔。以敦崇學校爲先。蓋學校之關係。乃風俗人心之根本。禮明樂備者。猶將踵事增華。簡略因循者。曷可不乘時興舉。按永寧。獨山。麻哈。三州。貴筑。普定。平越。都勻。鎮遠。安化。龍泉。銅仁。永從。九縣。尙俱未設學校。據該屬士子紛紛呈稟。荒寒之士。勵志芸牕。登進無自。臣偕司道諸臣籌議。建學育才。誠不可緩。凡一切庀材考工。何敢仰需公帑。至於額進童生。查貴筑爲省會附郭之縣。謹擬照大學考取十五名。餘則概照小學考取八名。武生貢廩。一循定制而行。董率職官。貴筑應請部選訓導一員。餘俱暫以附近教職兼攝。俟人文寢廣。另議專官。又按新添。鎮西。興隆。烏撒。赤水。五學。近因裁衛。歸併貴定。清鎮。黃平。威寧。畢節。五學矣。夫合兩地之人才。限一庠之定額。爲數較隘。生童進取。未免滯淹。以故連名訴陳。迄無止息。臣思五衛舊學。先師之所式憑。諸生之所景附。尙可輕言汰併。自應照舊。卽以貴定等五學。教官董率之。此確有直隸延慶懷來之近例。可援。凡此者。或留舊學於旣裁。或議新學於初創。臣非敢過瀆宸聰。實以黔省窮荒固陋。必崇文治而後可以正人心。變風俗。非如他省化行俗美者比。合應仰籲聖化之隆。仁義漸摩。馴致士風之厚。彼蠢爾有苗。當無俟七旬而咸。

格矣。再照平溪、清浪二衛學。歷係黔屬思州府提調。應試貴陽。不過五百餘里。前因用兵之際。將驛站改隸楚南。而學校隨之。諸生應試。東下武昌。迢遞川塗。不下二千五百里。資斧旣艱。而鼓柁洞庭。駭浪驚濤。士心恆多畏阻。臣赴任時。身過其地。同聲呼籲云。兩科以來。從無一士能赴武昌應試者。情殊可憫。應請復還黔屬。就近提調之舊制。以示作養。緣統係學制事情。用敢類列陳請。臣謹具題。丁焯曰。興起文教。爲撫綏邊荒第一要義。先生入黔。首上此疏。輒邀明詔報可。

定黔

明末流寇勢熾。張獻忠據蜀僭號。以延安人孫可望爲軍師。已而疑之。乃改爲平東將軍。又以李定國爲安西將軍。劉文秀爲撫南將軍。艾能奇爲定北將軍。陰制之。獻忠戮蜀人幾盡。次及其兵。漸及於將。可望等懼。值肅王至保寧。獻忠中流矢死。可望率衆犇黔。丁亥。正月。可望破遵義。入貴陽。出兵四路。搜捕箐洞。平威龍。新之閒。千里蕭然。無雞犬聲。二月。攻定番州城。屠之。三月。我朝大師西征。兵至遵義。可望聞風遁。屠貴陽城去。至鎮寧。參議武右文率衆拒守。城破被屠。竝屠安南。普安等城。遂入滇。總兵羅聯芳與前撫范鏞復貴陽城。四月。苗賊藍二糾衆反。陷澹潭。黃平。復圍平越。總兵張才擊走之。戊子。七月。僞忠國公王祥與皮熊搆即羅聯芳相攻。圍貴陽城。八月。武邦賢率兵敗之。圍解。十月。皮熊遣兵攻王祥。次烏江。爲祥所敗。己丑。正月。僞總兵張克誠由楚至偏橋。皮熊遣楊光謙敗之。八月。可望以通好爲詞。遣其前鋒白文選取安順府。遂入貴陽。攻青崖。白納。燕樓等箐洞破之。旋撤去。庚寅。四月。白文選襲貴陽。入之。李定國至自

滇與皮熊范鏞等盟而去。八月可望至貴陽。辛卯三月可望遣雲南僉事楊畏知謁永歷請封爲秦王。設行營各官及府州縣衛所官。遣營官臨田徵租以十之三給民。發兵攻遵義王祥走死。收其部數萬衆。盡令歸田。壬辰四月迎永歷於桂林。置之安籠所。凡永歷及隨行文武支糧俱報可望開銷。僅可以活。六月攻永寧。侯天桂降。十二月攻嘉定。武大定。袁韜降。甲午六月取重慶及涪州夔州。乙未正月李定國攻長沙。破桂林。爲馮雙禮所搆。走新會。丙申二月李定國由安籠奪永歷還滇。丁酉八月可望率兵向滇。與李定國戰於交水。白文選馬進忠內變。大敗還。十月劉文秀率兵追可望至貴陽。可望出走。詣長沙。降。論曰。張獻忠之起於秦。一萑苻草竊耳。寇晉豫入楚蜀。轉掠江右。犯粵西。二十餘年。遂致燎原莫撲。黔陽之地。飽其餘毒矣。然孫恩死而盧循尙存。祿山亡而思明復熾。究鋒虐焰。所向無前。民靡子遺。尙可問乎。窺其意。雖盆子私奉。聊假漢宗。而北漢乞憐。僅餘殘喘。蓋不過挾之以自爲計耳。卒之腹心內潰。敵國盡在舟中。蠻觸互爭。虎兕遊於柙外。纍卵之局。其何能久哉。幸也。天威之討將臨。知幾之哲尙蚤。降旗一片。早出石頭。夔峽三軍。遂平蕭銑。由於聖世之廓清。遂貽黔民之樂利也。迨後癸丑之冬。又一騷動。旋經底定。而木瓜金筑之間。歌昇平矣。

苗蠻種類部落

古稱三苗之國。左洞庭右彭蠡。則鄢郢以上皆苗也。詩云。蠢爾蠻荆。大邦爲仇。則三楚之間皆蠻也。黔僻處西南。窮山深箐。所在無非苗蠻。其種類各殊。而部落亦不一矣。爰稽其概。莫大於盧鹿。莫悍於狝家。莫

惡於生苗。何謂盧鹿。水西之羅鬼是也。族衆而地廣。故力亦強。所轄四十八目。八目之下。又有九扯。九縱。百二十夜所。皆黑種爲之。而白者則其部落也。何謂狛家。五代時楚王馬殷自邕管遷來。其種有三。一曰補籠。一曰卡尤。一曰青狛。貴陽定番。廣順皆青狛。而安順鎮寧頂營則補籠。卡尤也。何謂生苗。定番之谷蘭。興隆清平。偏橋之九股。都勻之紫姜。天壩九姓。九名。鎮遠之黑苗。銅仁之紅苗。黎平之陽洞。羅漢苗。峒人是也。此三者。苗之最爲患者也。若新貴之宋人。威清平遠之蔡家。則楚之所遷也。定番之八番。土人。龍泉之楊保。則或遷或土著之舊民也。其他若新貴之東苗。西苗。廣順之花苗。牯羊苗。龍里之白苗。貴定思南之短裙苗。永寧募役之白獠。平伐。平遠之犵狫。都勻黔西之木老。康佐。會竹。寧谷。西堡之龍家。都勻石阡。黎平之狛獠。新添。石阡之蠻人。普安之焚人。皆可以鞭箠使者也。其部落有轄於土司者。亦有散處於州縣者。其轄於土司者。貴陽所屬新貴。則有中曹。養龍。白納。虎墜。喇平。定番則有程番。土馬。小程。盧番。洪番。方番。韋番。臥龍。小龍。金石。羅番。大龍。盧山。木瓜。麻嚮。大華。廣順則有金筑。開州則有乖西。貴定則有平伐。大平伐。小平伐。把平。龍里則有龍里。水東。大谷。龍。小谷。龍。羊場。侑文則有底寨等司。安順所屬普安則有西堡。寧谷。鎮寧則有康佐十二營。永寧則有頂營。募役。沙營。普安則有土官營等司。此上游之土司也。而水西安氏不與焉。以言乎下游。平越府所屬平越縣。則有楊義。甕安則有草堂。甕水。黃平則有巖門。重安。朗城。餘慶則有土縣。丞主簿。新添則有新添。丹行。丹平等司。都勻府屬都勻縣。則有都勻。邦水。平浪。平州。天壩。獨山則有獨山。豐寧。爛土。麻哈則有樂平。平定。麻哈等司。鎮遠府屬則有土同知。土通判。土推官。

鎮遠縣則有土百戶。邛水偏橋等司。至於銅仁縣之省溪。提溪。烏羅。平頭。則屬於銅仁府者也。安化之辦事蠻。已沿河朗溪。土百戶縣丞主簿。覃韓。偏刀。水土巡檢。印江之土縣丞。婺川之土百戶。皆屬思南府者也。石阡府之石阡苗民。其自屬者也。龍泉之土縣丞。主簿。則自屬而總屬於府者也。黎平之潭溪。八舟。龍里。中林。古州。新化。歐陽。亮寨。湖耳。洪州。赤溪。西山。則屬於府者也。思州之都坪。黃道。都繁。施溪等司。亦屬於府。若此者。世其土。卽世其民。蟬聯而蔓衍。爭奪而戰攻。苗蠻之患。率釀於土司。自昔然也。

苗俗

十年幼學。曾披山海之經。蚤歲登朝。親與享王之會。以云祝記。未若今茲。離城十里之區。便是三苗之種。既無姓氏之譜系。孰察其詳。賴有父老之流傳。嘗聞其略。試言大者。莫過羅施。卽問從來。亦稱鬼國。長身黑面。依然豺虎之倫。刷齒縛屨。本是斲雕之習。布囊籠髮而爲角。在肩被羊皮。鳩杖鏤銀以稱直。更直蠻頂冠竹笠。食無兼味。盤盂皆用漆皮。病不延醫。禳除但從祈禱。行軍則率然相應。掉尾斷頭。諺云。水西羅鬼斷頭掉尾。相應。言其作字。田蝌蚪遺文。稱先則古。文字類千人馳鐵馬。張蓋可以招魂。婦時比屋質交關。刻木堪爲約信。重巖密箐。自云虎豹在山。勁弩長矛。寧畏車騎滿埜。烏蠻如此。羣獠可知。腰圍纏幅布。不假鍼工。犵喪祭競屠牛。祇思砍鱸。狎家居喪屠牛饗客茹毛飲血。蠕動之物咸嘗。白飾蕙結螺。埜植之竿共繞。龍家婦結髻若螺飾髮以蕙莖立。圍爐臥寒夕。夢魂飛去。不向衾枕搜求。苗皆無被席地宴嘉賓。竿酒傳來。亦自觥籌交錯。無

具插竿於酒而飲

新鬼大而舊鬼小。語任奚婆。

鬼師名

赤降殃而白降祥。卜憑雞骨。

看雞卦

持斧林閒翻拾橡。驅牛坂

上且高眠。醉鼓諸葛之銅。釀金賽社。

諸葛銅鼓。蠻人寶之。

冷吹媧皇之管。連袂踏歌。

編竹爲籥。笙以跳月。

短裙纒至。軒難拖六

幅瀟湘。窄褻僅齊腰。豈識五銖霧縠。然而盤絲繪蠟。亦自可人。

繡花於布。或蠟畫花。

抹粉塗朱。常多憐己。臨水自照。銀

環雙姍安。酷似簾鉤。

大而長。

鬢髮一蒙茸。全資馬鬣。

以馬鬣雜髮爲鬢而戴之。

雖采蘭贈芍。爲古聖之所不刪。而踰禮瀆

閑。亦國人之所共賤。畢方獨脚。時現如鶴之形。履髻雙精。徒弄吹燈之伎。欲寫鬼方之變相。難賣鉛爨以

搜求。聊爲雜俎之詞。用發掀髯之粲。

花苗

花苗在新貴縣廣順州。男女拆敗布緝條。以織衣。無衿竅而納諸首。以青藍布裹頭。少年縛楮皮於額。婚乃去之。婦人斂馬鬣。尾雜人髮爲髮。大如斗。籠以木梳。裳服先用蠟繪花於布。而後染之。既染去蠟。則花見。飾裏以錦。故曰花苗。其人有名無姓。有屬無長。不知正朔。以十二辰屬爲期。無文字。刻木爲信。魁結侏離。陟岡巒。躡荆棘。捷如猿獠。散處山谷。閒聚而成村。曰寨。誅茅構宇。不加斧鑿。架木如鳥巢。寢處炊爨。與牲畜俱。夜無臥具。掘地爲爐。爇柴而反側以炙。雖隆冬稚子。率裸而近火。所食多以麥稗。雜菹蔬。閒有稻。皆儲以待正供。或享賓。有終身不穀食者。每歲孟春。合男女於埜。謂之跳月。預擇平壤爲月場。及期。男女皆更服飾。粧。男編竹爲蘆笙。吹之而前。女振鈴繼於後。以爲節。竝肩舞蹈。迴翔婉轉。終日不倦。暮則挈所私歸。謔浪笑歌。比曉乃散。聘資以女之妍媸爲盈縮。必生子然後歸夫家。以季夏爲

歲首屠牛釀釀以祀天。有喪則宰牛。召戚屬。遠近犇赴。攜酒食以賻之。環哭盡哀。葬不用棺。斂手足而瘞之。其卜地以雞子擲之。不破者爲吉。病不服藥。惟禱於鬼。謂其巫曰。鬼師。鬼師。乘是以愚之。或宰牲磔雞。或殺牛。雖極貧亦必稱貸而爲之。往往以此破產。終不悔悟。動作必卜。或折茅。或熟雞。取其脛骨與腦驗之。

東苗西苗

東苗西苗。在新貴縣之谷池里。男髻髻。著短衣。色尙淺藍。首以織花布條束髮。婦著花裳。無裒。惟遮覆前後。俗與花苗同。

牯羊苗

克孟牯羊苗。在廣順州金筑司。懸崖洞穴以居。高者百仞。不設牀第。

青苗

諸苗之中。以上四種稱淳樸。憚見官。有不平。惟從其鄉老決之。輸租服役。比於良民。故其貧尤甚。

白苗

青苗在鎮寧州。服飾皆尙青。男子頂竹笠。躡草屨。佩刀。婦人以青布一幅。製如九華巾著之。性強悍。好爭鬪。同於羅羅。然不敢爲盜。

白苗在龍里縣。亦名東苗西苗。服飾皆尙白。性戇而厲。轉徙不恆。多爲人雇役。墾佃。往往負租而逃。男

子科頭赤足。婦人盤髻長簪。

谷蘭苗

谷蘭苗在定番州。性兇頑。善擊刺。出入必持鎗弩。蠻黨皆畏之。

平伐司苗

小平伐司苗在貴定縣。男子披草衣。短幫。婦人長幫。縮髻。祭鬼殺犬。死則瘞以木槽。

九股黑苗

九股黑苗在興隆衛凱甲司。與偏橋之黑苗一類。服尙青。性尤兇惡。處深穴。披重鎧。挽強弩。名曰偏架。一人持之。二人蹶張。矢無不貫。常嘯聚爲亂。

紫姜苗

紫姜苗在都勻丹平。與獨山州之九名九姓苗同類。狠詐而饜誠。以十一月朔爲節。元日忌門不出。二七而解。犯者以爲不祥。嗜殺尤甚。

短裙苗

短裙苗在思州葛彰。以花布一幅。橫掩及胛。

天苗

天苗在陳蒙爛土天壩。一名黑苗。緝木葉以爲上服。衣短裘。女子年十五六。構竹樓。墊外處之。死不葬。

以藤蔓束之樹閒。

生苗紅苗

生苗在施秉縣。紅苗在銅仁府。有吳、龍、石、麻、田五姓。衣被俱用斑絲。女工以此爲務。牲畜不宰。多掙殺。以火去毛。帶血而食之。死用棺。將所遺衣服裝像。擊鼓歌舞。名曰調鼓。每歲五月寅日。夫婦各宿。不敢言。不出戶。以避鬼。恐虎傷。卜用梳。同類相殺。以婦人勸。方解。凡出劫。富者出牛酒以集衆。有獲則中分之。遇殺死。出銀以償之。被虜者必索金贖。少則加以非刑。

陽洞羅漢苗

陽洞羅漢苗在黎平。婦人養蠶織錦。服短衫。繫雙帶。結於背。胸前刺繡一方。以銀錢飾之。數日必泚水沃髮。復滌之澗中。婚姻先外家。不則卜他族。遠者爲生苗。衣短衣。佩刀弩。小隙輒操戈。

黑羅羅

羅羅本盧鹿訛爲今稱。有黑白二種。居平遠。大定。黔西。威寧者爲黑羅羅。亦曰烏蠻。黑大姓。俗尙鬼。故又曰羅鬼。蜀漢時有濟火者。從丞相亮破孟獲有功。後封羅甸國王。卽安氏遠祖也。羅羅之俗。愚而戀主。卽虐之至死。猶舉其子。姓若妻妾戴之。不敢貳。故自濟火以來。千有餘年。世長其土。勒四十八部。部之長曰頭目。其等有九。曰九扯。最貴者曰更直。不名不拜。錫鏤銀鳩杖。僭擬師保。凡有大政。取決焉。次則慕魁。勺魁。罵色。以至黑乍。皆有職守。其人深目長身。黑面白齒。以青布帛爲囊。籠髮其中。而束於額。

若角狀行則荷甕戴笠見其主必左肩拖羊皮一方悍而喜鬪習攻擊尙氣力諺云水西羅鬼斷頭掉尾言其多且強也亦有文字類蝌蚪書坐無几席與人食飯一盤水一盂七一枝抄飯哺許搏之若丸以匕躍入口食已必滌臙刷齒以爲潔作酒盎而插以蘆管啐飲之男子薙髭婦人束髮纏以青帶烝報旁通覩不惡也疾不延醫惟用巫號曰大笑婆事無巨細皆決之正妻曰耐德非耐德所生不得繼立其長死則集千人披甲冑馳馬若戰以錦緞氈衣披死者尸焚於埜招魂而葬之張蓋於上盜鄰長首以祭不得則不能祭期會交質無書契用木刻重信約尙盟誓凡有反側剝牛以諭領片肉卽不敢復背善造堅甲利刃標槍勁弩置毒矢末霑血卽死

八番

八番在定番州服食居處與漢人同其俗勞女逸男婦人直頂作髻業畊織穫稻餼儲之刳木作臼曰椎塘每臨炊始取稻把入臼手舂之以寅午日爲市燕會擊長腰鼓爲樂以十月望日爲歲首葬不擇日夜靜出之

白羅羅

白羅羅永寧州募役司及水西皆有之一曰白蠻與黑羅羅同而爲下姓飲食無盤盂以三足釜灼毛鬪血無論鼠雀蚘蟻蠕動之物攫而燔之攢食若彘不通文字結繩刻木爲信死以牛馬革裹而焚之居普定者爲阿和俗同白羅羅以販茶爲業

打牙狻猊

狻猊其種有五。矯而善犇。輕命死黨。觸之則糜沸。得片肉卮酒。卽捐軀與之。男女皆以幅布圍腰。傍無襪積。謂之桶裙。花布者爲花狻猊。紅布者爲紅狻猊。各有族屬。不通婚姻。殮以棺而不葬。置崖穴間。高者絕地千尺。或臨大河。不施蔽蓋。樹木主於側。曰家親殿。在平伐平遠者爲打牙狻猊。剽悍尤甚。女子將嫁。必折其二齒。恐妨害夫家也。父母死。用長木桶爲棺。葬之路傍。

剪頭狻猊

剪頭狻猊。在新添。男女蓄髮寸許。死則積薪焚之。又有豬豕狻猊。身面經年不醜。與犬豕同牢。得隄卽咋食如狼。在清平者頗通漢語。聽約束。石阡之苗民司。黎平之八舟古州曹滴司。皆有之。

木老

木老。性狡悍。善製刀。初娶分寢。旣生子。然後同處。祀鬼用五色旂。遇節則鼓歌迎祭。亦有長幼之節。新添都勻。黔西皆有之。

狽家

狽家。貴陽都勻。鎮寧。普安。皆有。女人男子以帕束首。躡屨。好樓居。有姓字。衣尙青。婦人多織好。而勤於織。以青布蒙髻。若帽絮之狀。長裙。褶積多者二十餘幅。拖腰以綵布一幅。若綬。仍以青布襲之。短僅及腰。躡履。亦於孟春跳月。用綵巾編爲小圓毬。如瓜。謂之花毬。視歡者擲之。在室犇而不禁。嫁乃絕之。以

姿色定聘貲。多至牛三五十頭。喪則屠牛召親友。以大甕貯酒。執牛角遍飲。必傾瀉淋漓而後快。醉或至於相殺。習陰陽家言。葬用棺。以傘覆其上。期年而火之。不上冢。以十一月爲歲首。以牛馬雞牲骨用米糝和之。以作醑。至酸臭爲佳。以多者爲富。又多蓄蠱毒。夜飛而飲於溪。有金光。謂之金蠶。每以殺人。如不殺人。卽反噬其主。又斂百物之毒。以染箭鏃。中人。血濡縷立死。性險譎。嗜殺。出入必負強弩。帶利刀。睚眦之讎。必報。近者句遠。賊爲盜藪。或聚衆出劫。或禦人於途。累行征勦。然兵至則散。兵去復聚。難於持久。後用鵬剿法。稍稍寧戢。蓋黔之患。未有大於狝家者。

狗耳龍家

龍家其種有四。在康佐。會竹者爲狗耳龍家。衣尙白。好依深林薦莽之間。男子束髮而不冠。善石工。婦人辮髮螺結上指。若狗耳之狀。衣斑衣。以五色藥珠爲飾。貧則以薏苡代之。春時立木於埜。謂之鬼竿。男女旋躍而擇對。旣犇。則女氏之黨。以牛馬贖之。方通媒妁。死以杵擊臼和歌哭。昇之幽巖。祕而無識。以七月七日祭其先塋。

馬鏡龍家

馬鏡龍家在寧谷。西堡頂營之間。多張劉趙三姓。衣尙白。喪服則易之以青。婦人縑布作冠。若馬鏡。加髻以簪束之。一曰大頭龍家。男子以馬牛鬃尾雜髮而盤之。若蓋。以尖笠覆之。

宋家

宋家蓋中國之裔。春秋時宋爲楚子所蠶食。俘其人民而放之南徼。遂流爲辰。卽宋宣慰之祖也。通漢語。識文字。勤於耕織。男子帽而長襟。婦人笄而短襟。將嫁。男家往迎。女家率親戚箠擊之。謂之奪親。既歸。旦則進盥於姑舅。夕則燂湯請浴。三日而罷。喪葬飯疏飲水。二十一日封而識之。若馬鬣。

蔡家

蔡家卽宋人。亦爲楚所俘。在威清。平遠。男子製氈而衣。婦人以氈爲髻。飾以青布。若牛角。高尺許。用長簪綰之。短衣長裙。以耕織爲業。喪禮殺牛宰牲。吹蘆笙。羣聚跳舞。命曰作夏。

土人

土人所在多有之。在廣順。新貴。新添者。與軍民通婚姻。歲時禮節皆同。男子閒貿易。婦人力耕作。種植時田歌相答。哀怨殊可聽。歲首則迎山魃。逐邨屯以爲讎。男子粧飾如社夥。擊鼓以唱神歌。所至之家。皆飲食之。在黎平府曹滴司者。多思播流裔。

狎獍

狎獍。一曰楊黃。其種亦夥。都勻。石阡。施秉。龍泉。提溪。黎平。潭溪。新化。歐陽。中林。亮寨。湖耳。龍里。萬山之中。皆有之。荆壁四立而不塗。門戶不扃。出則以泥封之。男子計口而耕。婦人度身而織。暇則挾刀操笏。以漁獵爲業。把忌以三月朔。父母死。則焚其衣服。培其牛馬以祭之。婚喪以犬相遺。

蠻人

蠻人在新添衛丹行二司。性獷戾。以丑戌爲場。十月朔日爲節。祭鬼爲樂。又有冉家蠻。在石阡沿河司。俗與蠻人同。

楊保

楊保。播州之裔。性奸狡。其婚姻祭葬。悉同漢人。死喪亦有挽思哀悼之禮。龍泉爲多。

熨人

熨人在普安州土營各營。男子皆冠片氈。垢不沐浴。與滇之裸裸同。

峒人

峒人性多忌喜殺。出入夫婦必偶。挾鏢弩自隨。飲食辟鹽醬。冬以蘆花爲絮禦寒。在石阡司郎溪司者。頗類漢人。多以苗爲姓。在永從諸寨者。常負固自匿。然少爲盜。在洪州者。地肥多稼。而惰于耕作。惟善剽劫。常持刀挾弩。潛伏陂塘。踉蹌篋薄中。不可蹤跡。又招致四方亡命爲亂。歲饑愈甚。故黎平之盜。洪州爲最。

丁煒曰。一經一緯。合纂組以成文。殊俗殊方。閱細縑如指掌。荆楚歲時之記。無此雅馴。齊諧誌怪之書。遜茲詭異。豈惟談苑先資。實爲職方纂要。字當千緡。讀宜百迴。

黔風

盛德在木。見月令之首頌。迎春於郊。驗條風之甫至。漢家祀事。八佾舞以雲翹。唐制春官。三省賜來綵勝。

東京夢華錄。仗擊土牛。荆楚歲時書。紙裁春燕。簇簇生菜。佐餅登盤。翩翩風蝶。隨花戲鬢。若夫弛金吾之禁。放夜人行。觀安福之燈。踏歌聲滿。傳柑插柳。樂正月之良宵。麪蠶火蛾。徵開元之遺事。天津橋上。李謩爲吹笛少年。漁陽聲中。禰衡乃試鼓狂吏。雲霄看燈火。垂虹道士之橋。夜飲奪昆侖。浮白將軍之座。職方志在所不廢。風俗通自昔已然。率土攸同。黔風可紀。朱樓畫戟。高低陣馬。風檣玉貌。繡衣千百。番童熨女。蘆笙六孔。吹諧宮徵之音。社鼓三通。人作鸚鵡之舞。駝頭鳳腦。制自苗村。鶴焰鼇山。擎來木老。火樹星橋之下。九陌喧闐。木瓜金筑之閒。百蠻粧束。於焉卜歲。實維豐年。藉此觀風。豈非樂土。宜春帖子。熙熙蜂鬧。排衙寒梅枝頭。片片雪飄沾屐。扶竹筇而進酒。正值太常之齋。含蕚醬以立階。喜見鄉閭之舊。鬪雞蹴鞠。不比齊風。楚風跳月。斫牛。何嫌鬼國。羅國。化行俗美。因革莫拂乎人情。鑿井耕田。昇平總歸於帝力。爰紀一時之盛。聊當太史之陳。

迎春詩 土犂秃速毛。賴黃句。芒鴉髻鞭。篋長千夫。昇舉屨霧吐。春帖紅膩。蠻花張岑。车摻。擲次第起。立部之伎。何堂堂。權輿一隊。老農態。荷鉏馭犢。東作強。立旗大書。豐年字。蒙頭草笠。膠鶉裳。山謠秧歌語。莫辨。盱眙口眼。羣相將。逐隊結連。各變化。風檣陣馬。神飛揚。熨童年紀。十四五。朱鉛塗面。錦柄襜。或彈箜篌。弄箏笛。或披甲冑。揮戟槍。或騎兕象。佛子國。或鬪珠貝。波斯羌。壯者壁壘。頗與牧美者。嬌冶施兼。嬌旋風。豈類天魔舞。當筵不是成都倡。最後一隊。更奇絕。身輕一鳥。空中翔。聳尻翹足。立肩背。公孫劍器爭毫芒。斑文狸走雲。旂動游龍。蜿蜒來何方。掉竿弱索。又一隊。狎獍狔。排兩廂。村翁侏離。女狎鬼。

搖鈴跳月心顛狂。金鑲雙睛銀貼齒。假面獅子吟西涼。白樂天有四涼伎詩。上句即用白語。鍾馗手拍銅綽板。擲揄調笑隨白狼。傀儡登場乃如此。何年演自宜春坊。木瓜金筑接六詔。一髮萬里西南疆。山青敢嗟瘴癘毒。雪消且喜梅花香。羅施之戲迎春曲。放衙觀者如堵牆。他時探作黔俗記。蘆笙夔鼓牂牁鄉。
春鐙絕句。春聲乍沸夜如雷。報道寒花帶火開。三寸酸黃柑價賤。一椀茵醬竝傳來。濟火祠前試綺羅。奢香驛下舞婆娑。夜郎塞路人如蝮。大半番童爨女多。城北城南接老鴉。細腰社鼓不停撾。踢歌角牴蠻村戲。椎髻花鈴唱采茶。白納烏蒙舊有名。水西柳畔是龍阡。奚官金勒連錢馬。串作花鐙蹀躞行。火樹星橋取次看。硃書銀榜太平歡。小鬟鸚鵡調香粒。一老獼猴挂釣竿。雪後梅縣小雨涼。連宵拊擋鬪新粧。街泥不怕沾裙屐。蜀廟燒香賽竹王。米家燈樣巧功夫。記得熙筌好畫圖。十二屏風燒寶炬。幾枝紅淚作珊瑚。江郭風流未可期。紫泉春冶似當時。願將鐙火年年事。話與烏蠻木老知。

土官

明隆慶中。貴州土司安國亨安智起兵仇殺。撫臣以叛逆聞。動兵征剿。弗獲。將成亂。新撫阮文中將行。謁高相拱。拱語曰。安國亨本爲羣奸撥置。仇殺安信。致信母疏窮。兄安智懷恨報復。其交惡互訐。總出仇口。難憑。撫院偏信智。故國亨疑畏。不服拘提。而遂奏以叛逆。夫叛逆謂敢犯朝廷。今蠻族自相仇殺。於朝廷何與。縱拘提不出。亦只違拗而已。乃遂奏輕兵掩殺。蠻人肯束手就戮乎。雖各有殘傷。然亦未聞國亨有

領兵拒戰之迹也。而必以叛逆主之甚矣。人臣務爲欺蔽者。地方有事。匿不以聞。乃生事倖功者。又以小爲大。以虛爲實。始則甚言之。以爲要功。張本終則激成之。以實己之前說。是豈爲國之忠乎。君廉得其實。宜虛心平氣處之。去其叛逆之名。而止正其讎殺與夫違拗之罪。則彼必出身聽理。一出身聽理。而不叛之情自明。乃止坐以本罪。當無不服。斯國法之正。天理之公也。今之仕者。每好於前官事務有增加。以見風采。此乃小丈夫事。非有道者所爲。君其勉之。阮至貴。密訪果如拱言。乃開以五事。一責令國亨獻出撥置人犯。一照苗俗令賠償安信等人命。一令分地安插疏窮母子。一削奪宣慰職銜與伊男權替。一從重罰以懲其惡。而國亨見安智居省中。益疑畏。恐軍門誘而殺之。擁兵如故。終不赴勘。上疏辨冤。阮狃於浮議。復上疏請勦。拱念勦則非計。不勦則損威。乃授意於兵部題覆得請。以吏科給事中賈三近往勘。國亨聞科官奉命來勘。喜曰。吾係聽勘人。軍門必不敢殺我。我乃可以自明矣。於是赴省聽審。五事皆如命。願罰銀自贖。三近未至而事已定矣。

論曰。此事若如新舊撫臣所請。則西南之變。不待壬戌矣。幸新鄭獨持廟略。乃得無事。厥後西曰阿烏謎。復挾安位以叛。攻陷大方城。總督朱燮元走書撫之。述及前事。謎以詢故老。咸曰。信有之。乃斂兵就撫。如出一轍也。吾因是而重有感矣。馮猶龍曰。國家於土司。以戎索羈縻之耳。原與內地不同。彼世享富貴。無故思叛。理必不然。皆當事者或朘削。或慢殘。或處置失當。激而成之。反尚可原。況未必反乎。如安國亨一事。若非新鄭力爲主持。勢必用兵。竭數省之兵糧。以勝一自相仇殺之蠻人。甚無謂也。馮子此言。蓋有感

於壬戌之變也。安得不思新鄭爲後事師哉。

方言

拔。父也。一曰罷蒙。母也。一曰明的。孩也。努介。食食也。一曰儂。躄忽。往飲酒也。一曰呵。交努。擬食肉也。呵巴。飲茶也。呵應。食煙也。賽米也。歹。火也。沓。亦火也。甕。水也。大送。舂米也。介。雞也。拜豕也。擬牛也。一曰訛。商訛。放牛也。麻馬也。一曰米巴。亦豕也。猛已。趕集也。大弄。日午也。條。漢人也。雅犇。條不識漢語也。雅務。不好也。雅道。不得也。雨曰躄婁。

父爲包。母爲蔑。祖爲大。食食爲固。脈。飲酒爲固。悖。食肉爲固。窩。啜茶爲固。高。鷄爲黍。鴨爲阿。馬爲虐。犬爲磨。一爲序。二爲瘦。三爲大。四爲布。五爲目。六爲逆。七爲索。八爲遮。九爲梭。十爲完。織布爲陶打。傭工爲陶貢。趕集爲拜其。喪祭爲白號。

父謂之索。母謂之咪。兄謂之皮。朝饗謂之良捱。再飭謂之良林。夕飧謂之良喬。飲酒謂之良撈。食煙謂之良完。坐謂之壤。行謂之拜。揖謂之張。打謂之敵。畜豕謂之塵慕。傭工謂之果發。貿易謂之果介。直。趕集謂之拜謁。雨謂之汶到。晴謂之汶良。官謂之貫。

上墳曰砍地里。送客曰句業。管兵頭目曰抹色。書辦曰募施。伴僮曰必蘇。頭人曰海折陌耕。

丁煒曰。侏儻之音。譯以爾雅。知援引異類。當不讓冶城公耳。

阿溪者。清平衛苗。桀鷲多智。雄視諸苗。有養子曰阿刺。多膂力。被甲三襲。躍地起三五丈。兩人謀勇相資。橫行蠻落。苗之弱者。歲分畜產。倍課其入。旅人經其境者。輒誘他苗劫之。官司探捕。必謁溪請計。溪則要重賄而捕遠苗之不可用者。指爲賊以應命。於是遠苗咸憚。監軍總帥。率有歲賂。益恣肆無忌。時訂官苗。以收鷸蚌利。明宏治閒。巡撫孔公鏞廉得其狀。詢之監軍。皆爲溪解。公知不可與共事。乃自往清平訪部曲之良者。得指揮王通。厚禮之。叩以時事。通亶亶條答。獨不及溪。公曰。聞此中事。阿溪爲大。何祕不言也。通不對。固叩之。通曰。言之而公事辦。則一方受福。否則公且損威而吾族亦矣。公笑曰。第言之。何患弗辦。通遂慷慨陳列始末。公曰。爲阿溪通賂上官者誰也。通曰。指揮王曾。總旗陳瑞也。公必劫此兩人。乃可。公諾。翌日。將佐庭參。公曰。欲得一巡官。若等來前。吾自選之。乃指曾曰。庶幾可者。衆旣出。公詰曾曰。若何與賊通。曾驚辯不已。公曰。阿溪歲賂上官。汝爲居閒。辯而不服。吾且死汝矣。曾伏地不敢言。公曰。勿懼。汝能爲我取阿溪乎。曾因陳溪刺勇狀。且曰。更得一官同事。乃可。公令自舉。乃曰。無如陳總旗也。公曰。可與偕來。少頃。瑞入。公訊之。如訊曾者。瑞屢顧曾。曾曰。無諱也。吾等事公已悉。知第當盡力以報公耳。瑞亦言難狀。公曰。汝第誘彼出寨。吾自能取之。瑞諾而出。苗俗喜鬪牛。瑞乃覓善牛。牽置中道。伏壯士百人於牛旁。叢薄閒。乃入寨見溪。溪曰。何久不來。瑞曰。都堂新到。無暇。溪問都堂何如。曰。懦夫。無能爲也。溪曰。聞在廣東殺賊有名。何謂無能。瑞曰。同姓非其人也。溪曰。賂之何如。瑞曰。姑徐徐。何遽損重貨。溪遂酌瑞。縱談鬪牛事。瑞曰。適見道中牛。恢然巨象也。未審比公家牛若何。溪曰。寧有是。我當購之。瑞曰。販牛者非土人。恐

難強之。溪曰：第往觀之。顧阿刺同行。瑞曰：須牽公家牛往鬪。優劣可決也。苗俗信鬼。動息必卜。溪以難卜。不吉。又言夢大網披身。恐出不利。瑞曰：夢網得魚。牛必屬公矣。遂牽牛聯騎而出。至牛所。觀而悅之。兩牛方作鬪狀。忽報巡官至。瑞曰：公知之乎。乃王指揮耳。溪曰：王何得此美差。俟其至。吾當嘲之。瑞曰：巡官行寨。公當往迎。況故人也。溪刺將策騎往。瑞曰：請去佩刀。恐新官以爲不利。溪刺去刀。見曾。曾厲聲詰溪刺曰：上司按部。何不掃廨舍。具供帳。而洋洋至此。何爲。溪刺猶謂戲語。漫拒之。曾大恐曰：謂不能禽若等耶。溪刺猶笑傲。曾大呼。伏兵起。叢薄閒。禽溪刺。刺手搏傷數十人。竟繫之。馳貴州。見公。磔於市。一境始寧。論曰：苗盜之患。多起於漢姦。或爲之發縱。指示於中。或爲之補救。彌縫於外。黨援旣植。心膽斯張。跋扈飛揚。而不可復制。當事者非畏賊而偷安。卽養賊以自重。甚至句賊以爲利。其事之壞。大抵然也。自非孔公力排衆議。躬行延訪。用王通之言。借曾瑞之力。亦曷能不勞師旅。從容談笑。而坐致二賊於掌握哉。以賊取賊。固得要領。而其虛己從人。爲地方除害之心。亦何可及也。後之欲弭盜者。絕其賄賂之門。示以必死之法。庶幾其少豸乎。

平亂

紀平播之功。曰李化龍。死水西之變。曰王三善。其人同。其事合。其心一。而要之用兵各殊。故成敗亦異也。方化龍之督黔。以平播也。與黔楚撫臣同心併力。一出於剿。旣授命。則移鎮於重慶。而黔撫郭子章駐貴陽。楚撫支可大駐沅州。相犄角也。必俟延寧四鎮。河南山東天津滇浙粵西徵調之兵大集。然後啓行。最

慎重也。分兵八路。川師四路。總兵劉綎從綦江入。以參將麻鎮隸。參政張文耀監之。總兵馬孔英從南川入。以參將周國柱宣撫。冉御龍等隸。僉事徐仲佳監之。總兵吳廣從合江入。以遊擊徐世威等隸。參議劉一相監之。副將曹希彬受吳廣節制。從永寧入。以參將吳文傑宣撫。奢世續等隸。參議史旌賢監之。而中軍率標下遊兵策應。黔師分三路。總兵童元鎮統土知府瀧澄。知州岑紹勳等。由烏江。參將朱鶴齡受元鎮節制。統宣慰安疆臣等。由沙溪。總兵李應祥統宣慰彭元瑞等。由興隆。參議張存意。按察司楊寅秋監之。湖廣偏橋一路分兩翼。總兵陳璘統宣慰彭養正等。由白泥。副總兵陳良玘受璘節制。統宣撫單宜等。由龍泉。副使胡桂芳參議魏養蒙監之。以偏橋江外爲四牌。江內爲七牌。五司遣種及九股惡苗盤據。故也。而紀律嚴黨與散矣。部署已定。大會文武於重慶。登壇誓師。諸道竝進。以抵婁山關爲期。諭之曰。關外且戰且招。多不勝誅也。關內疾戰勿受降。師不可久。賊詐不可信也。又以劉綎繫有威名。薦綎於朝。委以專制。人或疑其夙與應龍昵。則延入臥內。輸心腹。且以危言激之。引其父顯九絲功爲比。致令綎大慟。願誓死報。又以水西爲應龍婚婭也。恐陰佐賊。則走檄以詰之。以故瀧澄僂其脩好之使。安疆臣執賊二十餘人。以明不背。志氣旣一。非同築舍之謀。駐兵旣得。治兵又有次第。任用又得其人。先翦其翼。次伐其謀。復伐其交。是以海龍圍合。應龍勢蹙。投降之書立焚。拜表之欺不售。而倉皇自盡。妻子并俘。自出師至滅賊。凡百十有四日。而事平也。若王三善則不然。初則奉命撫黔。聞變募兵。率皆烏合之衆。非久練也。平越一戰而敗。卽情縮而不前。視重圍之困。不啻秦人之於越。必待舊撫李標大聲疾呼。而後勉強以應。中情

怯也。乘西賊之敵。一鼓而潰。遂以賊爲易與。而欲解散。赴調之兵。驕必敗也。率師輕進。未幾而還。再抵大方。又欲反轡。舉動擾也。雖三路分兵。而卒皆遠調。帥俱不稔。主客不敵。形勢弗習也。其所任則惛懦之魯欽馬爛。所信則詐降之陳其愚。用非人也。懸師虎穴。弭節逾年。中隔渭水之河。聲援已絕。儲糗六廣之岸。轉輓多艱。失所據也。督主撫而撫主勦。心膂未齊。前跋胡而後窺尾。進退維谷。事權分也。師老而財匱。事拙而勢屈。況爲陳其愚所賣。烏有不敗者哉。嗟乎。黔地山川險阻異常。狼子桀心。不知漢大未有提十萬之師。而不爲餽糧計。深全軍之入。而不爲孤注虞者。兵法云。圯地勿戰。圍地勿攻。又曰。兵貴有謀。以多算勝。自宜先定其規模。非可慢嘗於一擊也。況水西之地。十倍于播。播猶八面圍。而水西止以一面攻。播無遠近之援。水西則有烏蘭之助。化龍乃以全力制之。而勿敢輕。三善則以獨力任之。而不爲意。何其謬哉。然而身沒戎馬。心同皎日。視死如歸。英烈猶存。王中丞之忠。固史冊書之。黔人祀之。歷千百世而不可泯者矣。

丁煒曰。用兵之道。先定規模。而後從事。李王三公成敗異效。亦定與不定之分而已。故追遡往事以示法戒。將二公先後勝敗情形。兩兩比照。政如充國談兵。動中默會。

黔書卷二

積穀

余於戊辰之八月入黔視事。值歲豐穀賤。凡一金可糴六斛。於是謀諸共事於黔者。相率出俸錢以易之。得穀三千石有奇。司會司書記之。倉人廩人掌之。蓋將以防天時之不常而濟地利人樞之不及也。周禮大司徒荒政十二。其言救荒最詳。而遣人掌邦之委積。以恤民之艱阨。廩人掌九穀之數。以治年之凶豐。此積穀所自來也。耿壽昌立常平倉。朱熹有社倉法。制非不善矣。而汲黯之矯制。繼之復何人乎。矧黔之無粟可發也。富弼知青州。勸民出粟。益以官廩。做而行之。又涉於多事矣。矧黔之民稀而久貧也。今惟以俸錢之所入。爲粟米之所出。不動帑。不勞民。何不可者。李愷有平糴法。以宏周給之仁。耿壽昌糴穀於近郡。以省漕卒之費。法固善而意亦良美矣。至於白居易極言輪糴之弊。蘇轍連疏青苗之禍。此又害民之甚者。今惟以市價之盈虛消長。隨商賈之貿易有無。不假胥吏。不驚市廛。又未見其不可也。況乎黔多石少田。山高箐密。去城郭五里之外。所隸皆狎獍狔椎髻鳩舌之徒。而行旅之蝟穴於闐闐閒者。朝而之蜀。之楚焉。夕而之滇之粵焉。非有恆產之守也。非有土著之樂也。非有甌石之儲而聚族之謀也。脫一旦雨暘愆。畊作廢。金死粟生。銜殫相望。卽爲之求轉移于蜀楚滇粵之間。是猶之渴而掘井。以七年之病而求三年之艾也。烏可得哉。不甯惟是。明天啓壬戌間。安邦彥之亂。賊圍浹歲。城中無米。人相食殆盡。此非

其明鑒歟。方今邊陲綏靖，苗蠻向化，仰賴聖天子柔遠德意，以共樂昇平，自可以弗慮乎寇盜。然而堯水湯旱，則未敢預計其必無也。積穀之舉，殆亦因地制宜，司封疆者，黽勉其所有事耳矣。

丁煒曰：自古救荒無奇策，惟先事預備，則無奇實至奇矣。先生始至黔，卽捐俸倡糴，本根深遠之計，豈規目前者可及。至以市價與商低昂，尤爲變通無弊。

鹽價

河東昆吾，波斯鬪賓，于闐骨咄，莫不有鹽，而黔獨無。仰給於蜀，微蜀則黔不知味矣。蜀之鹽不一產，要皆出於井，順慶之井久堙，塗墮之井有禁，所轉致者惟戒州耳。又不可以舟車通，肩瘡蹄血而後至，其來也不易，則直不得不昂。直昂而民之艱食者比比矣。黔民洵苦矣哉。三之月忘獨藜藿腸哉。當其匱也，代之以狗椒，椒之性辛，辛以代鹹，祇誑夫舌耳，非正味也。卽遇其饒，亦止沾脣而量腹，如水之交，不在樅羹也。尙安問其爲紫爲赤爲瑞爲散與夫爲苦爲飴爲形爲巨桃也哉。無他，困於錐刀故也。鹽之直取於穀，穀日賤而鹽不肯平，十鍾不能易一斛，安得而不苦其乏。夫鹽木枝可生，陸地可生，豈山國獨不生，毋亦牢盆之術未精，管商之政未講耶。不然，卽輸滇淮而足之，奚不可。然不必也。緩關市之征而覈居奇之盂，則幾矣。

丁煒曰：黔無鹽，故價昂而民甘食淡。筴黔鹽者，緩征覈盂而外，無他法矣。雖然，九州四裔之地，莫不產鹽，潤下正味，夫豈獨靳於黔，無亦川澤之奇，有待而發歟。先生撫黔，休嘉淪洽，地不愛寶，當必有仙羊。

舐滴之瑞以受裁成者其拭目俟之

禳火

黔之俗編竹覆茆以爲居室。句連鱗次。竈廩屢井無異位。其民貧。冬月率蓆帽卉衣。寒必向火。故歷來多火災。而列處城市者爲患尤甚。一遇火。往往延焚數百家。少亦數十家。不可撲滅。民苦之。當其將火也。水先鳴。水在城南曰南明河。攷黔誌所謂源出定番流合烏江是也。天不雨則鳴。牛吼鼓擊。聲聞十餘里。鳴三日必火。其應也。若操符券焉。於是謀之僚屬。而思所以禳之。戊辰十一月二十一日。庚寅水大鳴。因之齋戒二日。偕父老子弟。攜所具香盃豨醴。祝南明河之水。告祝融之神。并禱於南將軍之廟。事甫畢。水不鳴。火亦卒不應而民賴以安。

論曰。按春秋左傳昭公十八年夏五月。火始昏見。丙子風。梓慎曰。是謂融風。火之始也。七日其火作乎。戊寅風甚。壬午又甚。宋衛陳鄭皆火。梓慎登大庭氏之庫以望之。數日皆來告災。鄭裨竈請用瓘罍玉瓚禳火。子產不可。曰。天衢遠。人衢邇。非所及也。何以知之。竈焉知天衢。遂不與。亦不復火。夫火。心星。融風。木也。木火母。鄭祝融之虛。又火房也。梓慎之占。可謂信而有徵矣。子產尙不肯用裨竈之言。而今乃以水鳴驗之。豈有合於天衢人衢之旨歟。且水以剋火。五行之通論也。水鳴則無火。何以反謂之火。不亦附會誕妄之說而與梓慎之占大相徑庭邪。雖然。歐陽脩曰。自古賢智之士。皆爲其民捍患興利。則治黔於今日。苟於理有所拂而於民多所濟。吾何恤焉。黔鬼方也。俗信鬼神。因其俗而利導之。宣朝廷德意。以與民休養。

生息。此魯人較獵之遺意。而予之爲此。或亦不至見譏於鄭子產也。遂集黔之父老子弟而書此以告之。丁煒曰。善爲政者。必合民情而宜土俗。苟利於民。因而導之可也。況黔本尙鬼乎。先生爲民請命。精誠所格。息水止災。此與漢史所稱滅火反風何異。如必國僑是法。則安石新法。何嘗不本周官。無亦泥古之失。反遜得於從俗歟。

救火

左傳於魯鄭之國言救火甚詳。予之治黔也。以禳火之明日。而預爲救火之議。大率倣其意而行之。曰禳魯之徙龜告廟。鄭之大爲社祈於四鄰。卜筮走望。不愛牲玉是也。曰鉤梯水器。以二十人爲率。分衛用五百人。違命者罰。魯之言無備。猶拾瀋不用命。有常刑是也。曰濡物。魯之濟濡帷幕。鬱攸從之。蒙葺公屋是也。曰斷牆伐屋。魯之去表之橐衝。還公宮。鄭之司馬司寇。列居火衝。行火所熾是也。曰倉庫囚獄。魯之府庫慎守。官人肅給。鄭之府人庫人。各倣其事是也。曰稽奸驅飢。鄭之使司寇出新客縣士。各保其徵是也。曰賑恤營室。鄭之書焚室。而寬其徵與之材是也。曰城池戒伍。鄭之城下之人。伍列登城。授兵登陴是也。予倣其意而行之。然而魯鄭之救火一耳。而惟於伍列登城。授兵登陴之說。則略於魯而獨詳於鄭。吾知之矣。夫鄭小國也。彈丸孱弱。亦足羞矣。脫一旦乘會變作。事起倉皇。不有武備以爲意外之防。其如鄭之疆宇社稷。溱洧之士女何也。而東里大夫之用心。又良苦矣。黔孤城萬山。苗蠻環處。數年以來。哀鴻初集。櫓槍未靖。今日之因火以用兵。蓋以僑之治鄭者治黔。故曰放其意而行之也。

丁煒曰兵猶火也。利每相因，害亦相比。從來奸宄發難，每以撲火爲名。惟先事豫防，則其謀詘矣。先生精於經術，救火之議，事事與魯鄭合轍，乃獨詳於登陴授兵之說者，其亦火烈難犯之遺意歟。

山水

黔跬步皆山，然童阜也。至於水，舟楫不能通。又井榦之觀耳。水細矣，而山亦不雄。鋒攢鸞列，犖确而爲蹄。轍之妨，皆無足衝。然就黔而論，亦有可觀者。貴陽都會之區，風景自別。左棲霞，右相寶，夾岸連壤，負嶮相望。龍井湧於北，富水匯其南。杜若洲邊，扇趵泉上。偶一登臨，爲之房皇追賞。自威平而上，山莫大於雞背。關嶺尾灑，水莫迅於滴澄。盤江自龍新而下，陽寶石屏萬勝，梵淨山之至高者也。楊老甕城麻哈，重安水之至深者也。上游之山來自滇，而盤江之水則入粵。下游之山分於省，而麻哈重安之水皆入楚。烏江源自六圭，印水直通巫峽。羣山萬壑，雖云盡赴荆門，未嘗不遡崑崙而趣大海也。山皆石，則巖洞玲瓏，水多潛。故井泉勃窣，碧雲憑虛之洞，飛雲香爐之巖，得以分咏於昔人。而百盈噴珍之泉，胭脂神魚之井，亦得豎碑於淵底也。其餘一邱一壑，恠石犇湍，在在有之，而未暇詳。是皆禹跡之所不經，酈元之所未注。時無柳子，孰問鉅錡之潭，遊乏客兒，誰關石門之徑。遂使山靈藏其姓字，不求封禪於長安。水伯匿其聲光，以待品題之高士云爾。

丁煒曰：黔陽山水奇者，神運鬼工，使得列置中州，韻士高流，驂屐當無停晷矣。以渺在荒陬，不獲齒遇。方幅山靈亦若有不幸焉。是篇蒼撮佳勝，爲黔陽開闢以來之山水盡播姓氏於人間。讀者身在臥遊。

矣。

牂牁江

漢武置西南三郡。一爲牂牁。牂牁者。繫船杙也。華陽國志稱楚頃襄王遣將莊躋伐夜郎。軍至且蘭。楸船於岸。步戰滅夜郎。後人以且蘭有楸船。牂牁處。乃名其地爲牂牁。史記云。牂牁江廣數里。出番禺城下。後世求其地而不得。遂以爲在定番城南。源出蒙潭。流入破蠶。至泗城州通番禺。入南海。而郭青螺又引漢書郡有牂牁江。通番禺城下。光武時。牂牁大姓自牂牁江入貢之語。以實之。不知定番雖通粵西。而番禺則屬廣東。其城南之水。僅僅一綫。時斷時續。未聞有以舟楫行者。何以云數里之廣。而當時大姓。又何以由此入貢。亦未詳於志文之故耳。按且蘭卽今之遵義。夜郎卽今之桐梓。則牂牁江卽今日之烏江。自遵過湄甕。至印江入思南城西之巴江水。其地有牂牁城舊址。漢牂牁守陳立據思邛。詔夜郎王將兵破之。牂牁舊治。旣在思南。則牂牁之江。宜在思南。而其楸船之處。不在巴江。亦必在印江。蓋印江與湄甕接壤。而湄甕則且蘭舊地。楸船於岸。或卽此也。若定番則去且蘭尙數百里。且隔烏江。何處楸船而步戰。而牂牁大姓。又何以舍楚蜀大衝。紆迴兩粵。然後入關。以致貢哉。然則史記之言。出溯其源也。漢書之言。通論其流也。後之人旣不詳於本文。又不明於道里。是以有此誤也。

丁煒曰。牂牁江卽烏江。地在夜郎。今爲桐梓。昔唐蒙上書武帝。欲以夜郎精兵十萬。浮舟牂牁制越。若泗城之水。僅僅一綫。何以浮樓船十萬之師哉。先生考按詳明。足正青螺之誤。辨白趙而識惡谷。遂此

精核矣

紫池

黔之稱紫池不知何始。賞閱潯州志。有貴縣漢爲廣鬱。唐爲貴州。有水出於鬱江。長而狹。色如紫練。其出不常分兩派。一自縣門下流。一自縣上流。下名曰紫泉。紫泉自在粵西。與黔何與。顧以貴州之名相類。而謬引以相加耶。然潯志又云。府城北江爲黔江。而南寧志亦云。城西南有江左右流。至西合爲一。入橫州。曰鬱江。卽夜郎遯水。梧州志又云。城南大江。漢武使馳義侯發夜郎兵。下牂牁江。卽此。則鬱江也。遯水也。牂牁江也。一而已矣。紫泉雖出粵西。而實源於鬱江。謂黔爲紫池。其亦可也。毋亦志粵者因貴州與黔江之名。而亦謬引黔事歟。今黔獨稱牂牁。閒稱夜郎。夜郎乃播屬桐梓縣。播與貴陽僅隔烏江一綫。而平播之後。割其半以隸黔。今之黃平。湄潭。餘慶。是也。其稱夜郎也。又何不可哉。總之。黔近粵。則稱紫池。猶之近播。牂夜郎。地固犬牙錯也。第不當名之曰紫池。仍之以紫泉。庶名實相稱而易曉耳。

丁煒曰。辨紫池必備核潯梧諸誌。不欲以疑事予黔也。鬱江。遯水。牂牁。總爲黔水。紫泉發源於是。則名不當專屬於粵。論極通方。文兼古雋。當與王弇州仲宣樓記竝傳。

關索嶺

壯繆二子。長曰平。次曰興。平及於臨沮之難。興弱冠爲漢侍中。有父風。武侯甚愛之。征討未嘗不與。此傳志之可考者。初無所謂索也。是豈紀載之失耶。抑亦烏有之談耶。縱或有之。不過一偏裨耳。何以遂廟食

於此千秋而勿替。其功亦必有足述者矣。嘗試思之。古者帥與率通。方伯連率是也。意渡瀘之役。興也實從。曾駐師於此。當時以關帥呼之。又或有紀功之蹟。以帥爲率。後遂訛率爲索。莫之攷正焉爾。若夫馬跑泉之異。未必非神明其說。以讐蠻髦。事旣荒唐。時無特識。安得不妄以成妄耶。

丁煒曰。壯繆次子興爲侍中。旣爲武侯篤愛。征討未嘗不從。則渡瀘之役。當在行閒。令非有駿伐殊勳。何廟祀所在不絕。卽滇黔諸稱靈異。輒借關帥以神其說也。通帥爲率。訛率爲索。蠻荒侏離。絀繆。往往如是。拾遺之誤爲十姨。非尤其鄙陋可笑乎。或曰。蠻人呼索爲父。或曰。是嶺以關鎖黔滇。故名。茲二說者。煒皆未之信云。

葛鏡橋

平越東五里。兩山側塞。岸高湖深。下通麻哈江。水黝如膠。有風不波。人佃居於石壁閒。接手獲飲。霧羃山昏。寡見星日。少禽多鬼怪。昔人鑿石疏衝。縣緼以渡。九驛所絕。漢之張騫。甘英。皆不至也。今有橋。蓋里人葛鏡。縛長虹。架蹲鷗。而思卒業焉。旣建旋圯。再建復傾。於是齋戒百日。告黎峨之神。徙甕罌之窟。率妻子刑牲。醜酒於江上。作誓詞以明志。曰。橋之不成。有如此水。其言悲。其背張。如包胥之入秦庭。慶卿之離易水也。衣履穿決。形容枯槁。般倅爲之感動流涕。如是者垂三十年。而橋成。而葛鏡以名。異哉。鏡也。當治橋之難也。窳窳詰詰者衆矣。而矢死靡移。蕩其家室之所藏。一國非之不顧。雖事無足愜。然亦可謂豪傑之士。其生平志意。豈不偉哉。嗚呼。濟民利涉。國僑無聞。反不若草墊一善之行。傳世而久遠。是又葛鏡之羞。

也。

論曰。羊祜登峴山而悲傷。杜預銘功於石。投之漢水。大抵所役役者沒世之名耳。彼鏡匹夫也。卽不爲此橋。而自顧其人能長留於天地乎。家室之所藏。能果聚而不散乎。則謂鏡之才智善於獵名亦可矣。

丁煒曰。匹夫存心濟物。於物必能有濟。況鏡之毀家立名。百折不渝者哉。事雖眇小。然視斷斷守財爲子孫飲博費者。抑亦相去什百矣。先生與人爲善。特爲反覆論斷。其序橋之險仄也。如鬼嘯雲阿。猿鳴雪峽。其敝鏡之苦志圖成也。如寡婦夜哭。逐客晨號。傳神之妙。直奪化工。

鐵鎖橋

唐明皇作橋於蒲坂夏陽津。鑄鐵牛八。植柱纜二十四。連鎖十二山。架八牧人入於中流。分立亭亭。如虹蜺之狀。稱奇絕焉。然此乃安流通津。作之者易。不若盤江鐵鎖橋之難且奇也。盤江之源。出自金沙。入烏撒。繞曲靖西道。畢節七星關。而注於安南。入滇。所必經也。兩山夾峙。一水中絕。斷岸千尺。湍激迅悍。類天設以界滇黔。不知莊躑當日何以飛渡也。往以舟濟。多墮溺。明天啓閒。監司朱家民擬建橋。而不可以石。乃彷彿滄滄之制。冶鐵爲紐。三十有六。長數百丈。貫兩崖之石。而懸之。覆以板。矧於蜀之棧。而道始通。其功偉矣。然絙長則力弱。八行其上。足左右下。緝輒因之升降。身亦爲之撼搖。眩掉不自持。車馬必下。前者陟岸。後者始登。若相躡則愈震。其險也不可名狀。邇乃濟之以木。擇材之巨者數百排比之。臥於兩岸。水次鎮以巨石。柱以強榦。層疊而加。參差以出。鑄其本使固。及兩木之末。不屬者僅三十尺。有四。則又選園可

丈之木交其上。而後行者可方軌。聯鑣貫魚逐隊而不驚也。猶且施之以欄楯。幃之以版屋。塗之以丹雘。梵宇琳宮。鱗次於崖之左右。輝煌掩映。如小李將軍圖畫。遂爲西黔勝概焉。以視十二之連鎖。直緯索耳。況於沉江之陋耶。

論曰。余聞之黔人矣。去盤江二十里。由鎮寧僻徑西行。渡花河。歷普安。黃草壩。入彝音地。亦資音孔。水淺而路平。赴滇差便。乃何以萬里昆明。舍坦途而就艱阻也。明初傅湯諸人。伐山開道。拓疆闢土之日。豈其狃於成見而未之聞歟。抑盤江爲烏蠻郎岱地。不欲其奇險足恃。故深思遠計。爲驛使往來之衢。以通王會之車書也。不然。望跼跼之飛鳶。以祀神於金馬碧雞之境。不已難乎。

附何景明盤江詩

四山壁立色如赭。盤江橫流絕壁下。驚濤赴壑奔萬牛。峻架懸空容一馬。危叢古樹

何陰森。尋常行客誰敢臨。猺婦清晨出深洞。虎羣白晝行空林。沉潭之西多巨石。矩棹輕舟安可適。日光射壁蠻煙黃。雨氣蒸江瘴波赤。土人行泣向我云。此地前年曾敗軍。守臣祇知需貨利。將士欲苟圖功勳。英雄謨策自有術。竄婦奸男何足論。營中鼓角連雲起。陣前臨山後臨水。烹牛釀酒自酣樂。傳箭遣弓尙驚喜。戰馬俱爲山下塵。征夫盡向江中死。遂令狐豕成其雄。屠邊下豸轉相攻。千家萬家鷄犬盡。十城五城烟火空。夕陽愁向盤江道。黃蒿離離白骨槁。魂入秋空結怨雲。血染春原長冤草。只今異域來歸王。高墩短塹俱已荒。牧童驅羊上塋冢。田夫牽牛畊戰場。惟有行人長嘆息。聞說盤江淚沾臆。丁煒曰。盤江之橋。始不過絙鐵懸渡耳。近奉給水。餽錢構造。制始完備。輪蹄來往。如履康衢矣。夫土益

之後繼以豆籩皮卉之餘飾以黼黻天下踵事而工豈獨一橋哉先生明眼匠心歷敘結構之工如共般倕灑指至舍鎮寧坦道而務涉盤江昔人置驛實有深意蓋必欲苗蠻之險與中國共之也論中一筆道破政與明祖不殺奢香而令通九驛同意孰謂一橋無關撫馭歟

大相見坡小相見坡

嶺名黔人謂嶺曰坡在偏橋之東三重迭起高皆千仞計途周三十里陟首坡則尾坡見至尾坡迴矚之則首坡見立中坡前後望首尾畢見起伏偃仰石垂烟接方沈澗心突凌峯頂行者此以手招彼以口呼送響嚙於咫尺而不知三十里之遙也若以謝客卒徒千夫魚貫之如率然之陣矣以小李將軍圖之又如神山重樓矣首坡遐眺林木蕭森秋花掩映離離蔚蔚乃在霞氣之表中坡則素氣雲浮霧露沾人瀑布垂巖懸河注壑沿尾坡而下之白雨溪橫黃雲稻熟熨人率彼婦子挽裳以穫小犢在旁豸豸遶測客過輒起立去則侏離盱眙相對語擔夫勞瘁止息於樹下其聲嗚嗚山謔可聽也上山牛角西復東下山花開一簞紅半滑半乾石當路乍晴乍雨笠搖風干構纏腰布裹頭猿啼鷓鴣叫四山秋下來千尺商訛放牛也道固麥啖阿交酒飲好自由奈此翻漿白汗何趕場大弄日不停梭夕鷄也後嶺望前嶺雅務難好行小坡愁大坡唇下蘆鳴月下跳搖鈴一隊女妖嬈阿蒙母阿孛父門前立果役人來路不遙曲意亦難盡解大抵與朝發黃牛暮發黃牛三朝三暮黃牛如故巴東三峽巫峽長猿鳴三聲淚沾裳詞旨相類耳

丁煒曰。嶺曰坡。易之之詞也。然以遷客勞人陟此。則誠不易矣。黔之坡不可悉數。惟大小相見。以駸駸聯接得名。地爲苗蠻出沒之所。過客恆憂伏莽。先生撫黔威德遍加。魑結弭耳畏途。今坦途矣。煒以己已夏過此。擬有申詠。以次紀行。而鬱紆延眺。竟不能成一語。今讀茲篇。起伏崑崙之致。恍在目前。文之曲折如意。極類坡公。未附蠻歌。亦不廢滄浪之意乎。

白雲山

貴陽城南七十里。建文遜跡之所。上有羅永庵。庵前有井。名跪井。汲者必跪。乃可得。俗傳以爲溪龍所獻。以飲帝者。又有流米洞。帝居庵時。洞中流米供帝。及帝去。則不復流。又有大杉數株。謂帝手植。枝葉皆南向。嘗題三詩於壁。人傳誦之。

論曰。吾於紅篋一記。疑之者舊矣。半月之言。明祖蚤知其不終。則何不舉國以授燕王。如唐文皇故事。必待金川事起。而後爲行遜之謀。俾其流離瑣尾。少延旦夕乎。旣入滇。以依西平。何不乘仁宗旣殂。高煦告變之時。而說沐氏以伸大義。乃自甘流落。每至以淚洗面。豈說之而沐不肯從。抑帝本無意於光復舊物耶。旣已決意東歸。不從程濟之言。何不直詣京師。而又久憩此山耶。且是時楊葉雖亡。程濟尙在。何至煩飲食於鱗蟲神鬼耶。蓋荒唐之甚者。後帝詩爲同寓僧竊去。自稱建文。詣岑瑛言狀。瑛聞之。藩司因繫僧。並及帝。蜚章以聞。詔械入京。廷鞠之。僧實楊應祥。鈞州人。應祥論死。從行十二人。戍邊。帝有南歸之思。乃白其實。迎入西內。稱老佛。以壽終。旣云稱佛壽終。則程濟之著。得兌之歸妹。又何以云大凶。金火之相剋。

耶事之有無俱未可知矣。

又曰。遜國之事。自神樂觀啓行。由松陵而入滇南。西遊重慶。東到天台。轉入祥符。僑居西粵。結庵於白雲。題詩於羅永。兩人荆楚之鄉。三幸史彬之第。去來蹤跡。四十餘年。何鑿鑿也。況乎胡濙訪仙。岑瑛械送。吳亮伏地。豈盡道路之口傳聞異詞乎。然而大可疑者。據成祖之實錄。謂建文之自焚。國君死社稷。可云義之正矣。如必執行遜之說。以爲可信。殊不知瓦解土崩。倉皇變作。君行地道。臣出水關。痛哭者五十餘人。從亡者二十士。誰其從旁而紀注之。若是之詳耶。東西南北。姿意遨遊。爲岑瑛者。豈遂無其人。直待正統改元之歲。已易四朝。而後發露乎。兌之歸妹。旣曰凶矣。東歸而稱老佛。遼鶴而葬西山。不又與程濟之占相大逕庭哉。西內壽終。斯亦已耳。而吳亮之退而自經。抑何故也。觀紅籬之陳蹟。實千秋之疑案矣。或者六月四日。不肯直書於貞觀。燭影斧聲。只可依違于興國。且欲加建文以泰伯之讓。褒程濟如子家之忠。此史氏之曲筆後人之深意如是耳。至於牢落西南。長篇短句。謂出於好事者傳會之詞可也。

丁煒曰。建文行遜之跡。鑿鑿其在滇黔者最久。所傳牢落西南之什。實題於滇之武定。獅山龍隱庵。庵故帝久駐錫處也。在黔羅永之詩。或出於好事傳寫。至若跪而汲泉。流而獻米。此與釋氏虎跑木毬之說何異。其爲不經附會。無足深辨。所可疑者。明祖之不爲唐高西平之不爲敬業耳。夫立嫡以長。開創之君。必不忍首亂家法。而建文之優柔寡斷。久已無意光復。西平亦豈敢以南徼偏師。犯文皇英銳之鏢哉。惟歸稱老佛。旣與程濟之占刺謬。而吳亮自縊。或與壽終之說牴牾。先生從此窺出疑竇。直作一

篇翻案文字。謂史氏欲加建文以泰伯之讓。而諱成祖革除之非。論奇而理實。軌於正。嗚呼。安得起從亡十數君子。與之論當日情事哉。

扁趵泉賦附

貴陽城西岡巒稠複。石徑縈紆。衆山之閒。有泉一泓。瀏然清淺。廣不數尺。輕風徐來。波鱗微動。盡一晝夜。其盈其縮。以百爲度。中置一石以準之。莫之或爽。故字之以百盈。名之以聖泉。而通志謂之爲扁趵。不知何所昉也。余偶過而觀之。莫測其所以。因思天一生水。地六成之。水之貫通於天地。如血氣之貫通於人身。則水之盈縮。亦如人身之呼吸也。然人身之呼吸。刻可以百。而茲泉必以日計者。何。殆猶銀箭之壺。日百刻也。行止屈伸。乘除施閉。而不改其常度。亦可謂泉中之君子矣。吾鄉趵突泉。清泚噴吐。湍飛濤立。爲歷下奇勝。然濟水複流。來自王屋。有本者如是。而此則旱麓也。江海河澤。固無所不通耶。但惜其寂處山阿。烟涼草塞。旣無文石之壇。又無杞柳之樹。不足以憩遊人之屐。思爲磬石構亭。少助其勝。暇則攜陽羨茗。酌泉而烹。以終一日之觀。又何必學數息於道流。問測晷於令史也哉。

附賦富水之西。去城五里。峯迴逕轉。隱軫駢闐。在彼中阿。有流出焉。名曰百盈。字之聖泉。凌凌泐泐。潏潏涓涓。虎鬚方聚。魚目更煎。閱寒歷暑。不知歲年。置準其中。以驗後先。俛仰升沈。罔越罔愆。莫莢謝榮。璣衡廢旋。重黎解政。常羲罷占。綫景徒測。葭灰徒然。螳運周髀之磨。儀渾顛瑱之天。塵朴脩墜而未精。郭許晰理而難詮。一日之內。俄頃之閒。甫除甫乘。倏滿倏蠲。何必登觀象之臺。臨鐵勒之邊。商度次於

壺遂較盈虛於巫咸哉。此其所以爲百盈歟。方其進也。流行及其退也。坎止始焉。不驟終焉。不已如日之經。猶星之緯。莫測其源。莫竟其委。孰鍵其關。孰榦其裏。大旱竭澤而不焦。巨浸稽天而不圯。日晝日夜。日施日閉。見兮麇游。隱矣鳳舉。神龍之峇屈。肯伸至人之可出。可處。往而知返。求而能與。寸陰是惜。尺度必軌。不可得而抑。其可能而徙耶。此其所以爲聖也歟。吾聞水之潤地。脈之周身。一呼一吸。一縮一盈。釋氏數息而觀鼻。黃老驗炁以養生。動則俱陽。靜亦凝陰。華池灌漱。湧泉引伸。嗇淫尾閭。坻漏金莖。百蓄一洩。吐故納新。散華斂樸。翕虛闢清。按之澄泓。汲之困淳。節宣輔和。樞紐調眞。繇此而推。猶未可勝。潮有春秋之信。木有開落之辰。雁乘之而去來。蜚候之而蜚鳴。抑聞聖水之稱。不一其目。琉璃之澁。亳州之麓。烏龍二池。武陽一掬。巫山之峯。竝此爲六。更讀鴻書。亦云扁勺。語其情狀。比於勺突。惟厚德之難量。斯佳名之屢托。無怪乎閒至錦鞍。時停華轂。楚客對之而流連。風人臨之而躑躅。丁煒曰。安寧之潮泉。一日三溢。連州之樹窟。終朝十竭。要不若扁勺之百數爲至奇也。易曰。水流而不盈。行險而不失其信。君子體之。以常德行而習教事。夫百盈數也。歷終古之晝夜而不改常度。信之至也。非君子不足名斯泉矣。先生德行其常。彰信於民。而民懷之。異時構亭請以君子命名而表扁勺曰信泉。讀斯記者。當與茂叔廉泉竝生慨慕云。

白水巖

安莊南有白水河。來自萬山。渾洪風怒。濤湧波襄。雷轟雲洩。纓巒帶阜。不知幾何里。而後戢志斂魄。安步

鋪光。以至於層巖之巔。與石相商。疊爲三而後下。馮高作浪。雲垂烟接。白虹飲澗。銀漢倒傾。雖鄧艾絕厓。天孫織錦。豐隆奮地。不是過也。十丈之外。濺珠跳沫。時時浣人衣裾。風湍傳響於青林之下。嶺猿流聲於白雲之上。行李所逕。驂停馬立。常若目不周。翫情不給賞。下有靈犀。泳游出沒。踏碧凌晶。固太真之所不照。古冶之所勿挾者。每晨曦欲吐。重霧上騰。榮光塞河。遮蒙掩映。遙看素練。跡條有無。如冰綃之被玉肌。烟縠之籠皎魄。尤爲曠絕。不知何人鑄二大字於瀑下之石。盤空旣奇。斲骨尤巧矣。聞舊有傑閣對峙。遊者得以倚欄縱目。今則已矣。肆閱清楚。俛仰流連。茆屋數間。依然荒落。安得十日坐臥。與林徒栖託。雲客宅心也耶。

丁煒曰。瀑布之奇。至雁宕龍湫廬山谷泉而止。然皆飛流直下。若夫白練橫鋪。燭銀散布。縱廣以數丈計。而又挾轟雷之響。噴古雪之珠。碧潭搖空。靈犀吼地。則惟白水獨矣。篇中刻意摹寫。曲盡恫心誠目之觀。筆力堅峭。極似柳州諸記。而適逸過之。則本領殊也。

柳阮

黔志所載養龍阮也。在養龍司。去貴陽百里。壤接於烏江。蓋以馬而得名。其事見於明臣宋濂天馬贊曰。西南自昔出良馬。而產於羅鬼國者尤良。或云羅鬼。疑卽古之鬼方。其地有養龍阮。在兩山中。泓停瀟深。開闔靈氣。而蛟龍實藏其下。當春日始櫺。物情酣鬯。土人立柳阮畔。擇牝馬之貞者繫之。已而雲霧晦冥。咫尺不能辨色。類有物蜿蜒。上與馬接。蓋龍云。逮天色開霽。視馬旁之沙。有龍跡者。則與龍遇。謹其芻葭。

而節宣之。暨產必獲龍駒焉。粵若洪武四年六月壬寅。夏國長明昇以全蜀降。獻良馬凡十。而其一色正白。乃得之於阬者。身長十有一尺。首高九尺。尾之高比首而殺其二尺。有肉隱起項下。約厚五分。廣三寸餘。貫膺絡腹。至尾閭而止。精形明晃。振鬣一鳴。萬馬爲之辟易。韉勒不可近。近輒作人立而吼。上謂天旣生此英物。必有神以司之。親撰祝策。詔有司以牲牢祀於馬祖。然後勅典牧副使臣高敬囊沙四百觔。壓之人跨馬上。使其游行苑中。久之性漸柔馴。適八月癸酉。上將行夕月禮於清涼山壇上。於是乘之而出。如躡雲而馳。一塵弗驚。上情悅豫。賜其名爲飛越峯。復命御用監直長臣馬晉繪其真形藏焉。臣濂稽諸載籍。漢之元鼎中有神馬出渥洼水中。馬之生於水者尙矣。養龍之說。雖相傳於土人。要當爲不誣也。肆惟上以大德而立大寶。日之所出。日之所入。無不梯山航海。獻贊奉琛。邇者獨角之犀。來自九真。食火之鷄。貢於三佛齊之境。其他詭形譎狀。藉藉紛紛。且不一而足。而況此水產之龍馬乎。周書云。不寶遠物。則遠人格。所寶惟賢。則邇人安。上宵衣旰食。日懷保於小民。巖穴之士。蒐羅殆盡。將圖治安。如唐虞時。其遐荒殊裔。珍毓奇產。未嘗有心求之。所以榮光休氣。洋溢中國。仁聲義聞。充洽八表。而龍媒之異。自致於天。閑十二之中。揆之於書。前聖後聖。蓋同一軌轍也。其視貳師之遣。黷武窮兵。以索諸大宛者。果何如哉。臣濂以文字爲職業。際茲盛美。不敢默而無言。謹述讚辭一首。以貽諸後世。贊曰。天駟榮蛟龍升。靈泓澄神馬生。祥麟瑞鸞晝杳冥。太乙翕聚通精靈。龍鬣盈鳧臆。輕竹批耳鏡懸睛。花雪捲毛光照夜。汗溝有血霞流。赭振鬣鳴萬馬驚。閃流電。遂飛星。九霄彷彿從龍行。但聞瀟瀟風雨聲。山川平八極。甯真龍媒獻龍廷。

出入天門駕龍輶。太霞五彩滿瑤京。茫茫堪輿內。孰敢不來庭。陋彼漢將軍。空圍貳師城。乃知天子在樹德。不必連年徒用兵。厥後徐渭亦爲之歌。嘗攷唐明皇時。靈昌郡得異馬於河。龍鱗虺尾。拳毛環目。肉鬣居帝閑二十年。後西幸至咸陽。馬入渭水化爲龍。蓋亦類是矣。然而瞻懷茲窟。陳跡猶存。煙霧不興。驂駟寂寂。過其地者。望官柳斜陽。有味嘆流連而巳耳。爰作柳阮行以代招天馬之吟。非效王子淵語也。

附詩 麴塵楊柳春三眠。風晴絮飛鋪白氈。兩山夾岸生堊煙。栗畱鳴樹何翩翩。拖藍一沼清且漣。下有萬丈蛟龍淵。牝驪下嫁柔絲牽。俄頃異物來蜿蜒。晦冥雲物紛句連。神駒生長烏江邊。粵昔貢自洪武年。載拜稽首蠻王箋。其毛如雪鱗如拳。首高九尺花連錢。壓沙八斛箭控弦。奚官不用珊瑚鞭。天閑十人喧闐爭誇此馬真。無前天子下詔黃帕纏。賜名飛越峯以傳。沙苑雲錦那並肩。王毛仲爾將徒然。貳師將軍絕可憐。西域笑指中郎騫。羅鬼嶺下奔紅泉。但餘春水流濺濺。按圖索駿空盤旋。老鴉關上斜陽懸。臣濂之筆豐如椽。高謔更有青藤篇。

丁煒曰。阮號養龍。則龍種當復不絕。何今固寥寥也。豈千里馬常有而伯樂不常有歟。抑諸巨故狡黠。即得善馬。匿不以聞歟。通篇全引宋文憲序頌。止於末段一寓慨嘆。便覺全體生動。昔王荆公嘗稱東坡表忠觀文字。極類史記。煒於茲篇亦云。柳阮行篇掩抑低徊。意態橫出。老杜韓幹畫馬行有此神致。

明天啓乙丑。水西安邦彥。蘭州奢崇明。糾合窟益烏蒙。舉兵犯滇。直抵馬龍。鋒銳莫可當。人鮮鬪志。黔省戒嚴。調陶土司兵會勦。有一象。深伏小塹。鼻吸泥水數斛。乘賊不意。突出跑吼。躍起數丈。噴鼻中泥水作雲霧。直挫賊鋒。人馬皆辟易。復卷一悍賊。擲天墜地。蹙踏如糜。賊咸披靡。有裨將乘機逐北。獲全勝。及暮收兵。象尙勃勃具餘勇。鼻中毒矢。一次日創劇。遍體出鏃。餘三升。遂斃。滇黔之人德之。爲封瘞立碣於馬龍南山之陽。余爲之補銘辭於石曰。惟茲有象。見諸大易。目細形龐。鼻長齒巨。肉兼衆獸。膽隨四季。生於曠塹。育在坊肆。動若雲徙。靜如山峙。七寶牀施。五紋繡被。厥性至靈。頗知節義。曾代舜耕。亦奔尾燧。授彼金函。舉足拔刺。道以拜舞。瞠目不踦。何讓英賢。無嗤異類。卽此一戰。安危攸繫。衆皆束手。爾獨攘臂。羣寇奪魄。三軍吐氣。峩峩高邱。豐豐古碣。血化爲燐。骨埋成玉。餘烈猶生。抱忠入地。草青雲黃。麟輶風最。丁煒曰。馬龍之役。無象則幾無滇矣。以一象而障全滇。受鏃三升。猶有鬪志。此與面中六矢不動者何異。昔明祖有書某不如象以媿元臣者。斯冢存。選愼將帥可以媿矣。異事傳以佳銘。令烈象凜凜猶有生氣。勝爲曹蜎李志作諛墓語也。

涵碧潭

定廣威平之水。至四方河始合流而入南明。越霽虹橋東。將折而北。水至此淵而不流。是爲涵碧潭。煙雲演漾。風日遲回。穀軟鷗眠。沙明蚌兩。令人悠然作濠濮閒想。上爲鼇磯。石梁互之。昔所築以障水也。磯上有甲禿樓。阿閣三重。丹青綺分。望若圖繡。紫池人士讀書地也。左武鄉侯祠。斷碑歸然。記征蠻也。右維摩

關微雨佛燈。山僧往來也。闌光瓦影。下上參差。梵響磬吟。近遠互答。每春波搖綠。秋沚澄青。岸柳乍垂。芹芽正弩。覽漁舸之泛泛。洗盃罍以臨流。誰謂黔中無佳山水哉。接羅可倒。安問習池。姓字如傳。何須漢水。余於是一往有深情矣。

丁煒曰。唐荆川評柳子厚諸記。以馬退山茅亭爲第一。謂其發穠纖於簡約。存至味於平淡。茲篇實爾神似。

飛雲巖

天下之山聚於黔。延袤數千里。行旅往來。日攀躋於窮嶺絕壁之間。手胼足胝。雖夙癖泉石者。莫不困頓踣躓。聽鷓鴣而生悔。謂莊躑之多事也。東坡之陽曰飛雲巖。途次至此。則心目開霽。又皆裴回瞻眺。遷延徙倚。而不肯徑去。豈謂黔山無奇足以殫人也哉。山下有溪。石梁互其左。可作津逮。水聲漑漑然。餘溜風吹。雁次相綴。過橋歷級。升之。印眎空際。插天桀豎。競勢爭高。若攢圖之托霄上。忽而霧籠煙接。擊絮湧綿。離離如螺髻形。故曰飛雲也。既陟。則兩旁怪石揖我以入。大於數百閒屋。蛟蛇獅象。由碧乳滴瀝而成者。上垂下伏。鬚甲皆動。面前三峯拱立。高與檻齊。僅及巖之半。石色青紅各殊。牽拂相招。向人欲語。聞巖性好潔。昔有信宿於此。而身垢者。既去。則瀑水突至。瀾漫山椒。而澣之。再垢復澣。庾何米倪之癖。不足多矣。下有月潭寺。古杉萬本。梗柯參連。橋刺藤梢。裁通逕步。老衲引觀殘碑於譚側。王陽明一記。雖剝落猶可辨。日暮登車。茫茫前路一帶。惟童阜耳。所云殫人流連。正未可多得也。遂索筆題二詩於壁。

附詩飛雲巖立翠千重。草艸登臨日下春。莫信人間唯五嶽。須知天末有三峯。秦灰漢壘羣仙宅。雲陣花幢古佛蹤。如此奇山誰領略。曾無七十二家封。粘天拔地湧明霞。虎豹司閭瀑布遮。鬼斧神工峯口石。紅酣白糝寺門花。客兒遊屐何曾到。支遁禪栖便是家。跬步從前應自笑。真同井底一寒蛙。將行又徧閱巖壁之詩。有前人一篇。內數句云。不知太始前。誰鑿鴻濛透。造化才易竭。竒竒恐難又。寓中佳洞壑。孰能出其右。舊題若薜積。拂拭勞襟袖。剗削真宰泣。掉頭疑不受。安得鬼斧利。一爲洗癥垢。余立讀久之。自顧急就章唐突茲巖。必不免水淫之覺。湫矣。

丁煒曰。天地清淑之氣。至西南而盡洩於山水。巖若飛雲。天巧極而人工詘矣。煒嘗縱眺巖端。遍捫碑碣。竊嘆作者雖多。能括靈竒之祕而得其神似者。指未一二屈也。鴻篇不作。鑿牙硬語。而澹遠蕭疎。自爲茲巖添毫頰上。

雙井

習安城東北隅一井。名雙井。上有石欄。居人汲左以炊則色紅。汲右以炊則色白。是豈可以尋常理道求哉。嘗閱異物志云。廬陵城中有一井。中有二色水。半青半黃。黃如灰汁。取作糜粥。皆成金色。此色之一定者也。又閱廣州記云。鬱林郡有石井。半甘半澹。潛通江波。冬夏長盈。此味之一定者也。獨習安之井。其源同也。其色同也。其味同也。何以汲之以炊則遂不同。然其不同也。不在乎水而在乎井上之欄。與夫汲之者垂綆之左右。斯爲造物之竒而不可解者矣。水之竒如此。而寂寂不聞於世。此蘇子瞻所以歎鄙道元

之簡而笑李勃之陋歟。又習安有胭脂井。炊稻餅成桃花色。鮮妍可愛。故得名。然於義別無所取。蓋與景陽宮畔同名而異實也。

丁煒曰。井以欄分。色以鑿別。此豈與涪漢之水殊其利鈍者比哉。問誰以蒲元之刀。劃玆白赤也。造化鑄物。真不可以常理測者。短章論著。古勁無前。可補寰宇記所未逮。

碧雲洞

槃州出郭里許。平疇交風。淨翻綠浪。環溪繞陌。清見赤顛。沿緣曲徑。直造巖陰。有洞憑焉。豁豁忽裂。齒頰皆露。不知鴻蒙何年鑿也。一屏當門。灑青抹綠。遊者摩挲拂拭。疑爲古玉。幽流旁洩。瀾瀾作擊筑聲。上有片石。如泗濱之浮磬。又如涿鹿之神鉦。叩之清越。以長。始入暗甚。必假松炬以行。沙石錯然。夏人踝趾。坐息少定。則劃然開朗。天牕漏日。下射層深。毛髮可數。黃颯下垂如斗。瞿曇大士。番僧之像各一。或倚巖舞。或踞石趺。或蹠厓仰觀。鬚貌如生。絕壁千尺。有龍升之。長與之竟。倘使葉公見之。知其必驚走也。稍進。則駭浪轟雷。奪人氣魄。望之欲止。左方一徑甚微。側仄畚欷。足不可置。前牽後挽。蝟附螺旋而後達。丹竈藥鑪。無一不具。安期耶。羨門耶。何以舍青城而穴處於此也。巍然一塔。拔地粘天。鬼斧雖工。憑誰著想。漸進漸溼。亦漸陞。不欲往。亦不敢往。乃緣巖而上。可出洞頂。俯視萬山川。原歷歷。乃復知有人世。一僧爲予言曰。水入洞則世運泰亨。蓋已信而有徵矣。

丁煒曰。歷寫洞中詭祕之景。如數家珍。王弇州遊張公洞記。可以方駕。夫天降嘉應。河水先清。地發人

文。丁溪成畫。山川之靈。與運會合。水入洞爲泰運。徵理固然也。

東山

九月既望。雨霽。出東郭二里。登東山。一峰孤立。與城樓對峙。山前壁峭崖懸。莫可扳躋。由北岡傾曲而上。徑紆烟接。援蘿尋葛。陟於巔。佛屋三重。午鐘微響。僧舍少憩。遶廊西入大士洞。穿竹塢而北。坐危閣。凭闌高矚。山城周遭。吞吐上下。千峰霞舉。萬嶺雲迴。一郡烟火人家。歷歷在目。夫昔人翺此閣。覽黔盛也。而黔之盛難矣。自平播平水西而後。又數經喪亂。以訖今日。卽哀鴻甫集。室廬相望。貧則徙。災則散。其何以長有此盛乎。善人爲邦百年。勝殘去殺。黔之貧且災已數十年。其綏輯安全之也。方五六年。余治黔未一年。而於茲覽其盛者。由聖天子止戈蠲租仁義涵煦之深也。僧梅溪郡人。能詩。善言黔遺事。余聽之不禁太息云。

丁煒曰。偶爾登眺。無限低徊。與歐公豐樂亭記同一興會。

甲秀樓

甲秀樓建於貴陽城南。江公東之之所從事也。越今百餘年矣。波濤洶涌之衝激。風雨雷霆之動搖。烏得有完樓哉。蓋江公而後無復喜從事者。何今人之不逮前人也。江公當日知樓之有關於黔而皇皇爲之。且有關於黔之人才風氣而以甲秀名之。其用意深矣。假使江公之後。或數年而一人焉。或三五年而一人焉。而不聽乎波濤洶涌風雨雷霆之交於樓也。樓雖不完。亦不若今日之甚矣。無如江公而後。遂

成絕響。落落百餘年。閒無復喜從事者。斯亦樓之不幸也。使人而皆喜從事。則天下何足治。不獨一樓然矣。後之君子。常有所不屑則躁。否則惰。躁則妄。惰則廢。既妄且廢。則天下之所以不治者。常出於此。而不足怪。嗚呼。此蘇子瞻之所以致歎於驛館歟。夫事之始也。有剏之者。事之終也。有成之者。當夫創者既往。成者未來。欲存欲亡。可斷可續之際。有人焉。存一綫以待來。茲其人不可少。其功最大。如經學與理學。相表裏也。理學成於宋儒。雖矣。然言誠。言敬。言禮。言格物。致知。正心。誠意。莫不本於經學。苟於嬴氏灰燼之餘。非得漢儒諸人。經各有注。傳各有釋。火盡薪傳。以聞於後世。彼宋儒欲直接洙泗之淵源。詎可得乎。蓋前事者。後事之借。而絕續之交。不可無其人也。嗟哉。此樓也。江公之後。有人焉。今則事半而功倍者。惜江公之後。無人焉。今則事倍而功半也。大抵泄泄焉。無復喜從事者。吾慮黔之終無此樓也。於是鳩工集材。而新之。度木於林。伐石於山。計瓦甃。墁釘於匠。興功於己。已之二月。凡百五十日而成。立於魚磯。烟水之上。跨乎長橋。垂虹之間。可以爲黔人之美觀焉。雖事倍功半。遠不逮江公之所爲。亦可以無遺憾矣。然而人才風氣之所關。其在斯乎。今日者。風氣日挽。人才輩出。甲乙科名之盛。又於黔士之文章。卜之不盡。係乎樓之完不完也。余將以告夫後之喜從事者。

丁焯曰。斯道絕續之交。不可無人。漢儒訓故。實於宋儒有守待之功。未可妄肆評議也。先生記樓而及經學。理學。隱然以斯道薪傳。自任。樓之興廢。關乎黔之人文盛衰。建樓卽以興學。江公而後。得有先生。是天之欲以斯道大造黔士也。